





by Lion. Pantaleoni

ci de Rubrif

9-25-79

642.631

6-49-a-8

DES. ERASMI

ROTTERODAMI

De

SARCIENDA ECCLE-

SIÆ CONCORDIA,


deque sedandis opinionum dissi-  
diis, cum aliis nonnullis  
lectu dignis,

L I B E R.

*Ex Editione Frobenianâ, anni  
M D XXXIII, cum gratiâ &  
privilegio Casareo.*



LUGDUNI BATAVORUM,  
Ex officinâ JOANNIS MAIRE.  
c1515cxl11.



DES. ERASMUS

ROTTERDAMUS

*Clariss. viro*

IULIO PFLUG

S. D.



*Vantopere te  
pigeat horum  
semper in peius  
gliscentium dissidiorum,  
quantoque pectoris ardo-  
re suspires piis omnibus  
optabilem Ecclesie con-  
cordiam, Iuli vir ornatissi-  
me, satis arguunt tot tuæ  
\* 4 ad*

ad me epistolæ , semper  
eandem occinentes cantile-  
nam , magnaue instantia  
efflagitantes , ut huius tem-  
pestatis me sedatorem  
præbeam. Quod quum tu  
nihilò verecundius facias,  
quam si iubeas Pygmæ-  
um, Atlantis vice, sus-  
tinere cœlum , tamen à  
me nullam admittis ex-  
cusationem. Erras tu  
quidem , mi Iuli, vehemen-  
ter, ignorantia mei. Ve-  
rum hic error, quo ma-

ior



ior est , hoc magis de-  
clarat insignem tuam pie-  
tatem erga dei domum .  
In qua tu non infimum  
tenes locum ; tenesque  
ob eximias virtutes  
tuas meritissimo : qui-  
bus hoc decentius orna-  
ris , quod hinc nullum  
omnino tollis supercilium ,  
sed agnoscis domini muni-  
ficentiam. quales viros si  
multos haberet Respubl.  
Christiana , aut hi tumul-  
tus non extitissent, aut iam  
pridem

pridem essent consopiti. Ipse vero sic inter sacrum, ut aiunt, & saxum constrictus, ut quod flagitas nec recusare per te liceat, nec ex me præstare valeam, medium quiddam repperi, quo te posthac utar aliquanto placatiore. Tractavi Psalmum 83. in quo divinus ille spiritus mire nobis commendat ecclesiæ concordiam. Non parum iuvat hortator in hoc sane negotiorum genere.

*in quo bona pars facti est ,  
propensa voluntas ; cui  
nunquam deesse solet be-  
nigni numinis praesidium.  
Quod si Christus & il-  
lud largiri dignetur , ut  
ecclesiasticae pacis amor , quo  
tu tam insigniter flagras ,  
omnium animos corripiat ,  
brevis futurum est , ut  
nec tu flagitando , nec e-  
go recusando sumam ina-  
nem operam , sed uter-  
que alteri gratulemur. Ve-  
rum à Psalmo non te  
remo-*

*remorabor diutius. Da-  
tum Friburgi prid. Cal.  
Aug. 1533.*

**DES.**







DES. ERASMI  
ROTERODAMI

De

AMABILI ECCLE-  
SIÆ CONCOR-  
DIA LIBER.

**P**salium octogesimum  
tertium ob id seligi-  
mus enarrādum, quod  
in eo spiritus sanctus,  
multis argumentis ma-  
gnaque tum evidentia tum vehemen-  
tia, nobis speciosam illam ac beatam  
ecclesiæ concordiam commendat:  
qui sermo quum omni tempore salu-  
taris est atque utilis, tum vero hoc  
seculo sectarum feracissimo videtur  
ita necessarius, ut non alio magis.  
Quisquis igitur diligit pacem illam,  
quæ iuxta beatum Paulum exuperat  
omnem sensum, quæque sola cu-  
stodit & ab omnibus malis tuetur  
corda & corpora nostra in pacifica-

A

tore





tore Iesu Christo domino nostro, ad hanc auditionem aures animosque attentos adferat. Titulus nonnihil habet scrupulorum, sed his quanta poterimus brevitate discussis ad pulcherrimi simul & amœnissimi spectaculi contemplationem alacriores ingrediemur.

Titulus igitur in codicibus nonnihil variat, sive id accidit scribarum studio, sive sermonis Hebraici ambiguitas hanc nobis peperit varietatem. Septuaginta sic reddidere: In finem pro torcularibus filiis Coræ Psalmus. Hieronymus hoc pacto, Vincenti pro torcularibus filiorum Coræ psalmus.

Quum audis, in finem, intellige psalmū tractare de Christo, qui † finis, hoc est, perfectio legis est omni credenti. Nulla est enim vera perfectaue iustitia, nisi per fiduciam sinceram erga illum, qui solus fide purificat corda mortalium. Quum audis, Vincenti, sive, Pro victoria, protinus in mentem tibi veniat

† *Rem. 10.*

niat illud Paulinum, Neminem assequi beatam illam coronam gloriæ nunquam marcescentis, nisi qui legitime certaverit. Quidam ex Hebræi sermonis peritia submonuit, pro Vincenti, potuisse verti, effundenti sanguinem, ut non levem & incruentam pugnam, sed acce prælium, & ut Græci dicunt *ἀσπονδὸν πόλεμον* intelligas. Quum enim qui huic militant mundo toties sua corpora telis hostium obiiciant, suamque vitam ambigui Martis alex committant, ut supplicationem, ovationem, aut etiam triumphum assequantur, eumque ridiculum verius ac ludicrum quam speciosum, quem nemo vir gravis absque risu videre posset, cuius universa pompa uno circumagitur die: quid non facient Christi milites, ut æternum illum triumphum assequantur in cœlis? Quanta nunc est gloria martyrum, qui suum effundendo sanguinem, per fidem \* vicerunt regna, operati sunt iustitiam, & adepti sunt beatas promissiones?

A 2

Quo-

\* *Hebr. 11.*

Quorum encomia per universum resonant orbem, & angelis applaudentibus sempiternum cum duce suo Christo triumphum agunt in cœlesti Hierosolyma. Quanquam & hi qui Paulo auscultantes amore Christi mortificant membra sua, quæ sunt super terram, libidinem, avaritiam, iracundiam, aliosque id genus affectus, spiritui reluctari solitos, non incruento bello vincunt Satanam. Iam & in ipso psalmo fit mentio Tabernaculorum, sive tentoriorum. quod militiae verbum est. Porro quod in titulo additur, pro torcularibus, nonnihil torfit Divum Augustinum, eo quod in Psalmo nulla fiat torcularium mentio. Itaque confugit ad allegoriam. Verum animadvertere poterat, Psalmorum titulos interdum indicare argumentum ex historia, velut in Psalmum 33, Psalmus David cum mutavit vultum suum coram Abimelech, & dimisit eum, & abiit. Interdum diem festum quo decantari solet. velut Psalmus 91 titulum habet, Psalmus cantici in die Sabbathi

Sabbathi. 92, Laus cantici David in die ante Sabbathum. 93, Psalmus David quarta Sabbati. Nec oportet historicum sensum reiicere, quo locus fiat allegoriæ, quum ille sit huius basis & fundamentum, qui cognitus facit, ut aptius tractetur intelligentia retrusior ac mystica. Itaque titulus propheticus, quum addit, pro torcularibus, indicat mensem septimum, qui apud nos September est. Nam prisca à mense Martio quum sol ingreditur Arietem faciebant anni initium: & ab hoc numerantibus, quoniam quintus erat is qui post dictus est Iulius, Quintilis appellabatur, & huic succedens Augustus, Sextilis, ac cæteri item usque ad Decembrem, ex ordine sortiti sunt nomen. Quoniam autem mense Septembri vindemiæ tempus est, significantius erat, & ad mysterium accommodatius, dicere, pro torcularibus, quam mense septimo. Sic Horatius initium veris indicans non inamœna figura dixit, Zephyris & hirundine prima. Simul autem indicantur dies festi, quibus

hoc canendi certamen inter prophetas celebrabatur. Hinc est quod aliquot Psalmorum titulus habet mentionem Liliorum sive Rosarum, vernum tempus indicans, & eius temporis festa. Nam quum Iudæis tria fuerint festa præcipua, Pascha in memoriam prodigiose transmissi maris, & Pentecostes in memoriam legis in monte Sinai latæ ac receptæ, & tabernaculorum, de quo mox dicemus: Primū incidebat in veris initium, Secundum in ver iam adultum, Tertium in autumnum. Nam Septimi mensis die xv festum erat scenopægorum, à figendis tabernaculis dictum. Septem enim diebus iuebantur commorari in tabernaculis, in memoriam veteris historiæ, quod ex Aegypto profugi, per vastam & horridam solitudinem peregrinantes, annis quadraginta habitarent in tentoriis, Deo viam monstrante, nocte per columnam igneam, interdiu per columnam nubilam, cuius interim beneficio, nec potus nec tibus illis defuit, nec vestes aut calceamenta detrita

DE ECCLES. CONCORD. 7  
detrita sunt. Quo tempore & tem-  
plum ipsum erat tabernaculū, man-  
sitque donec Solomon extrueret il-  
lud templum Hierosolymis, ipsis et-  
iam ethnicis venerabile. Huius tam  
benignæ numinis providentiæ ne vel  
ipsi possent oblivisci, vel ad eorum  
posterios non perveniret tanti mira-  
culi notitia, iussi sunt quotannis cir-  
ca vindemiæ tempus tabernaculorum  
festum agere per dies octo, idque  
mense Septimo: qui quodammodo  
sic in mensibus est Sabbathum, quæ-  
admodum in diebus dies Septimus,  
in annis septimus annus, qui terris  
quoque suum dabat ocium, in an-  
norum hebdomadibus, Iubileus se-  
ptem annorum complectens hebdo-  
madas. Ex his ergo Septimi mensis  
octo diebus primus erat Sabbathum,  
utpote tertiæ hebdomadis initium,  
& item Octavus quartæ hebdomadis  
initium. Uterque ieiuno & ocio per-  
agebatur. Cæteri qui inter hos in-  
tercedebant, sacrificiis, hymnis, gra-  
tiarum actione & gaudiis solennibus  
transigebantur. Octavus tamen dies

A. 4:

velut

velut novi festi principium erat, videlicet cœtus sive collectæ, quod tum præter impendia sacrificiorum ac donorum nonnihil à singulis colligeretur, in sumptus tabernaculi. His de rebus tractatur Levit. 23. & Numerorum 29. Proinde quanquam in titulo non est expressa mentio tabernaculorum, est tamen tacite comprehensa, designato mense, quo Scenopegiorum festum celebrabatur, collectis iam omnibus terræ frugibus. Mensis autem ille ferme totus festis & sacrificiis peragebatur, quo simul & Levitis provideretur, & populus agnosceret se quicquid terra produceret divinæ munificentiae acceptum ferre debere: ut nec ad luxum abuterentur, si quando annona provenisset largior, nec desponderent animum, si quis annus extitisset sterilior: ab ipsis admoniti tabernaculis, quod quum per steriles arenas ac sitientes facerent iter, dominus non passus sit illis quicquam deesse, sed manna demiserit è cœlo, aquam effuderit è petra. Nam qui fieri possit,

ut

ut qui sic vestit agrestia lilia, qui pabulum suppeditat passerculis, sinat famulos suos egere necessariis, præsertim quum piorum sobrietas paucissimis sit contenta? Quo turpius est, quod hodie Christiani quidam, ubi divina benignitas uberiores annonam effudit, non ad gratiarum actionem, non ad liberalitatem in sacerdotes & pauperes, sed ad lasciviam, luxum ac libidinem convertuntur. Contra si paulo malignior fuerit proventus, obliti superioris abundantiae, ac defutura diffidentes, intendunt rerum pretia, contrahunt manus in egenos, accidunt quod debetur sacerdotibus, frustrantur creditores. Quanto dignius erat iis qui Christi titulo gloriantur, ut quo parior fuerit anni proventus, hoc effusior esset divitum in pauperes benignitas? Non enim Deus in hoc dedit messem uberiores, ut in tuis horreis frumenta computrescerent, sed ut quod superest in usus pauperum dispensaretur. Ita fieret, ut superiore fertilitate videre non indi-



10 ERAS. ROTEROD.

gnus, & in sequentibus annis maiorem domini liberalitatem promerearis. Porro festum illud tabernaculorum quod olim à Iudæis celebrabatur, *τυπικὸς* designasse celebritatem Ecclesiæ Catholicæ, non obscure declarat propheta Zacharias capite 14. Erit ruina, qua percutiet Dominus omnes gentes quæ non ascenderunt ad celebrandam festivitatem tabernaculorum. In eodem Capite fit mentio torcularium : ut huius Psalmi argumentum ex eo prophetæ loco sumptum videri possit. Illud vigilanter annotatum est ab Hieronymo, tres esse Psalmos, quorum titulus meminit torcularium. Octavus, qui inscribitur David. Octogesimus, qui inscribitur Asaph. Et hic octogesimus tertius, qui inscribitur filiis Core. Quibus & hoc commune est, quod omnes meminerunt victoriæ. Ogdoas autem resurrectionis gloriæ dicata est. Hic est enim dies quem fecit dominus à mortuis resurgens, in quo iubemur lætari & exultare tripudiis spiritualibus, Nam ubi resurrectio, ibi

**DE ECCLES. CONCORD. II**  
ibi vita est. Vita autem est innocen-  
tia, quemadmodum peccatum mors.  
Primus igitur dies plausibilis erat  
hominis ad imaginem Dei conditi,  
de quo tractat Psalmus octavus, of-  
tendens, hominem ita conditum, ut  
angelis esset proximus. Secundus e-  
rat hominis per legem ad innocen-  
tiam revocati, quod indicat Ogdoas  
decies multiplicata, decalogum fi-  
gurans. Hic tertius ostendit homi-  
nem per Evangelii gratiam eo perfe-  
ctionis evectum, ut licet corpore de-  
geret in terris, per fidem tamen ac  
spem conversationem haberet in cœ-  
lis. Eoque decem ogdoadibus addi-  
tur ternio, quod per Evangelicam  
lucem mundus universus cognovit  
dilucide mysterium sacræ Triadis.  
Patrem noverant & Iudæi, sed po-  
steaquam filius assumpta natura hu-  
mana in terris visus est, & cum ho-  
minibus versatus est, moxque rece-  
ptus in cœlum, emissio cœlitus spi-  
ritu innovante linguas ac mentes  
omnium, tum demum dilucide mun-  
dus agnovit, in tribus personis unum

Deum , & in eadem natura divina tres personas, patrem & filium & spiritum sanctum. Quoniam autē gentes solent vindemias prophanis & impiis ritibus in honorem ridiculi Bacchi celebrare , in compositis ludis, indecoris saltationibus, & obscœnis verbis lascivientes , cuius insanix dolemus in hodiernum usque diem nonnulla conspici vestigia: Moses publicam lætitiā ad religiosam gratiarum actionem, petulantes motus ad propheticas saltationes, (Nam & David in honorem Dei ante Arcam saltasse legitur) impios hymnos & impudicos sermones ad mysticos Psalmos convertit, effecitque, ut impurus cultus , quem aliæ nationes dæmonibus exhibebant, in veri Dei cultum verteretur. Habebant & gentes in his festis sua certamina , in quibus homines parum sobrii, facie facibus oblita de plaustris ridicula carmina iaciebant : victori præmium erat hircus, dignum ut aiunt patella operculum. Hic inter prophetas erat certamen, plenum religionis ac re-  
verē-

DE ECCLES. CONCORD. 13  
verentiæ. Unde Psalmi complures in  
titulis habent, pro victoria. Tale  
certamen & Apostolorum tempori-  
bus erat in cœtibus Christianorum:  
Unus loquebatur linguis; plures, pro-  
phetæ officio fungebantur. Nec hic  
fervebat indecora contentio, sed si  
cui alteri fuisset revelatum; prior ta-  
cebat. Nec victus sibi displicebat,  
sed gratias agebat spiritui, qui per  
aliud hoc docere voluit, quod ipsum  
fugerat. Nec victor efferebatur ani-  
mo, sciens, totum hoc esse divini spi-  
ritus energiam, qui cuique divide-  
bat sua dona prout volebat. Tale ca-  
nendi saltandique certamen erat in-  
ter hos prophetas. Hoc exemplo nos  
erudimur, ut sive laboramus & affli-  
gimur adversis, sive rebus prosperio-  
ribus delinimur, omnia in gloriam  
Dei faciamus. Nunc complures Chri-  
stiani tantum in morbis, bellis, aliis-  
ve periculis Deum invocant, & ita  
distinguunt tempora, ut tristitia secent  
Deo, lætiora tribuant Satanæ. In  
funere charorum videas aliquam  
pietatis speciem: in nuptiis, in vi-  
ctoriis,

ctoriis, in conviviis, nullum Christianæ mentis vestigium. Existimant, abunde satisfactum Deo, si per tempus quadragesimæ paulo vivant severius. sed imminente quadragesima, quam itreligiosa licentia? rursus exacta ea feriis Paschalibus, quanta aviditate reditur ad intermissas voluptates? Atqui decebat Christiana gaudia non minus habere religionis quam luctum. Quam diu versamur in his tabernaculis, sunt varix rerum vices. Est tempus nascendi, & est tempus moriendi. Tempus nubendi, & tempus abstinendi à nuptiis. Tempus gaudendi de natis liberis, & tempus lugendi defunctos liberos. Sed Christianis nullum oportet esse tempus vacuum à pietate. Sub festum diem celebretur ieiunium, sed religiosum: festus dies requirit læticiam, sed spiritualem. Illic nonnihil contristamur, sed secundum Deum: hic lætamur, sed coram domino. Quemadmodum de gaudiis Evangelicis loquens Esaias cap. 9 ait: Lætabuntur coram te, sicut qui lætantur in messe.

DE ECCLES. CONCORD. 15  
messe. Bene lætantur qui lætantur  
coram Deo, qui pura conscientia il-  
li pro tristibus pariter ac lætis gra-  
tias agunt. At qui læticiæ temporib-  
us, alex, temulentix, turpiloquiis  
& scortis indulgent, coram mundo  
fortasse lætantur, coram Deo insa-  
niunt. Sed his forsitan diutius im-  
moramur, quam sat est, utinam &  
sine causa! Absolvamus igitur tituli  
mysterium. Octavus Psalmus inscri-  
bitur David. quæ vox Hebræis sonat  
manu fortem. Octogesimus Asaph.  
quæ sonat, congregantem. Hic o-  
ctogesimus tertius, filiis Core, hoc  
est, calvariæ. Iuxta sensum retrusio-  
rem, tribus nominibus idem Chri-  
stus significatur. Ille condidit homi-  
nem rectum: pater enim per filium  
condidit universa, quæque in cœlis,  
quæque in terris. Id nemo potest nisi  
omnipotens: Unde Paulus scribens  
Hebræis, filium appellat verbum vir-  
tutis paternæ. Idem hominem col-  
lapsum; eoque deiectum, ut iam  
comparandus esset brutis animanti-  
bus, & similis factus esset illis, ne di-  
cam

cam deterior, recollegit per legem, & donec veniret plenitudo temporum, velut cancellis inclusit. Unde & synagogę vocabulum. Et Psalmus Asaph, increpando provocat ad legis observationem. Israel, inquit, si audieris me, non erit in te Deus recens. Denique congregatoris personam ipse dominus proficitur in Evangelio. Hierusalem Hierusalem, quę occidis prophetas, & lapidas eos qui missi sunt ad te, quoties volui congregare te, sicut gallina cōgregat pullos suos sub alas! & noluisti. Tandem ubi venit plenitudo temporis, idem factus filius Core, in monte Calvarię sub-latus in crucem universum orbem ad se congregavit, & in eodem resurgēs devicto Satana triumphavit. Hic fortasse scrupulus aliquis tãget animum lectoris, quomodo Christus filius Dei, dicatur filius Coræ, qui quum esset ex Levitis præcipuus, ambiit summum sacerdotium, & adiunctis sibi Dathan & Abiron, totam fere multitudinem concitavit adversus Moysen & Aaron, sicut refertur Numer.

Numer. 16. Cui quotquot pertinaciter adhæserunt, partim vivi à terra dehiscente absorpti sunt, partim igni cœlitus emisso absumpti. Sed nihil absurdi habet allegoria. Christus iuxta carnem è gente Iudaica duxit originem, pertinaciter rebellis adversus Deum. De qua queritur per Esaiam † prophetâ: Extendi manus meas tota die ad populum non credentem & contradicentem mihi. Rursum in Psalmis: Quadraginta annis proximus fui generationi huic, & semper dixi, hi errant corde. Quam pertinacem rebellionem exprobrat illis & Stephanus in Actis Apostolorû: Vos semper spiritui sancto resistitis. Complures autem Psalmi in titulis habêt, filios Core, nec ullius tamen nomen exprimitur: quasi satis esset ad illorum laudem, dici filios Core: quum iuxta communem hominum sensum ignominia videatur, scelerati patris & horrendo exemplo damnati cognomine designari. Quis enim sustineat appellari filius aut nepos Iudæ  
prodi-

† *Esa. 65. Rom. 10.*



proditoris? Et tamen scriptura laudis gratia notat posteros Core, progenitoris nomine, cuius impietas illustravit filiorum pietatem, qui cum essent arctissimis naturæ vinculis astricti seditionis autori, tamen in illis affectum naturæ vicit amor religionis. Siquidem, ut est probabilis coniectura, aut auscultantes Mosi resipuerunt separaruntque se à patre, aut sic apud illum remanserunt, ut impio proposito nequaquam assentirentur, eoque illo cum suis absorpto filii servati sunt, ut legis Num. 26, nec ob patris scelus à tabernaculi ministerio submoti sunt, sed honorifico lanitorum officio functi sunt, quemadmodum refertur 1. Paralip. cap. 26. Insuper & prophetico spiritu præcelluerunt. Ergo quum Deus non imputet parentum commissa filiis, nisi facta illorum imitentur, inique facit hominum vulgus, qui liberis non aliter exprobrat progenitorum scelus ac supplicium, ac si ipsi perpetrassent. Tuus inquit pater de peculatu convictus, in crucem actus fuit, & audes hircere?

hiscere? audes venire in conspectum hominum? Sed pulchrius est, ex malis prognatos virtute claros evadere, quàm si quis bonus nascatur ex bonis. Cæterum iniquius etiam faciunt, qui filiis non scelera parentum, sed fortunam aut calamitatē probri gratia obiciunt. Novi inquit patrem illius servum, aut vidi mendicum. Et qui hæc dicunt, ipsi sibi ignoscunt, quod dediti vitiis turpissimam servitutem serviunt Satanæ, quod pauperum rapina ditescunt. Ex patre servo nasci non est turpe, sed servire libidini, avaritiæ, cæterisque vitiis, turpissimum est. Mendicare panem si urgeat egestas, non est turpe, sed egenis non impertire necessaria, ac rapto vivere, crimen est exprobrabile. Et qui sibi ignoscunt vera propriaque commissa, proximis exprobrant alienam fortunam. Quanto Deus civilior erga nos? Non imputat nobis nostra delicta, quorum semel pœnituit. Quod facinus execrabilius quam fuit Core? aut quod supplicium detestabilius? haud illud quidem homine iudice, qui nōnunquam

nunquam fallitur, sed Deo. Et tamen huius filios sermo propheticus honoris gratia progenitoris nomine signare maluit quam propriis vocabulis. Similis inhumanitatis est quod qui ex Iudæis progeniti, à parentum impietate conversi sunt ad veram pietatem, contumeliæ causa vocamus Maranos, quum ea gratia plus illis honoris debeatur. Quod si iustum, maiorum vicia impingere nepotibus, unde nos prognati sumus? Nonne ex his qui in veri Dei contumeliam, coluerunt ligna & lapides? qui martyrum sanguinem effuderunt? Sed ad rem. Core, Dathan, Abiron, & Hon, conati sunt dividere tabernaculum, quemadmodum hæretici & schismatici semper conati sunt ecclesiam discindere: sed ut in illos præsens ira Dei desæviit, ita qui moniti nolunt ab impiis sectis ac seditiosis conatibus resipiscere, hos sine dubio manet gehennæ incendium. Atque in simili rerum statu, oportet omnes esse filios Core, ut nec filius contra pietatem adhæreat patri, nec frater fratri,

nec

nec uxor marito, nec gener socero, sed ab impiorum tabernaculis secedendum est, si non corpore, certe animorum dissensione: & si quid erroris per incogitantiam obrepfit, auscultemus Mofi, & moniti meliora sequamur: quo post exantlatos huius vitę labores, in monte domini bibamus mustum sempiternę lætitię, & concorditer viventes in tabernaculo dei, quod est Ecclesia, recipiamur in cœleste tabernaculum ecclesię triumphantis. Video, me in explicando titulo prolixiorē fuisse, quam proposueram. Ad Psalmum igitur properabimus.

*Quam dilecta tabernacula tua, domine virtutum!*

**A** Bruptū huius Psalmi exordium declarat impotens animi desiderium. Quod genus est & Psalmi 72. Quam bonus Israel Deus iis qui recto sunt corde! Aptius est quod legit Augustinus, Quam amabilia! Gręce est ἀγαπτά. Nihil est pulchrius, nihil

hil amabilius, nihil tutius aut firmitus bonorum in bonis consensu; ut contra nihil turpius, nihil abominabilius, nihil infirmius conspiratione malorum in malum. Habent enim & impiitabernacula sua, quorum & hic Psalmus meminit, & is qui hunc proxime præcedit. Quoniam cogitaverunt unanimiter, simul adversus te testamentum disposuerunt: Tabernacula Idumæorum & Ismaelitæ, Moab & Agareni, Gebal & Ammon, & Amalech, alienigenæ cum habitantibus Tyrum. Et Psalmus secundus, Principes convenerunt in unum, adversus dominum & adversus Christum eius. Sicut est unica ecclesia. Et tamen Paulus ita loquitur: Sicut in omnibus ecclesiis doceo, sentiens, esse multas distinctione locorum ac personarum, unicam professione fidei, & sacramentorum communione. Ita multa leguntur tabernacula Dei, quum revera sit unicum tabernaculum universos electos completens, quoniam omnes in Christo sunt idem. Contra impiorum, quoniam

niam in religione ac fidei dogmatibus dissentiunt, nullum est commune tabernaculum, sed impii cum impiis sic dissentiunt, ut variis quidem modis ac nominibus, sed tamen pari impietate dissentiant à tabernaculo Dei. Olim Græci & Romani deridebant Aegyptios, bovem Serapim, & Cercopithecus, atque adeo cepe pro diis colentes: sed ipsi interim lapides ac ligna, aut in his latentes demones pro vero Deo colebant. Sic Lacedæmonii habebant sua tabernacula, diversa à tabernaculis Asianorum. Habebat & Gallia Druidas propriæ cuiusdam religionis magistros, sed cum vera religione pugnantes. Horum typum gessit Dathan, Abiron, & Hon. In suo quisque tabernaculo stabat paratus ad pugnam. Erant inter se divisi, in hoc concordēs, ut Moſen expugnarēt. quemadmodum diverſarum gentium diverſæ religiones, inter ſe diſcordes, mira tamen concordia & ſyncrētiffimo, perſequebantur Iudæos, ac poſt maiore conſpiratione Chriſtianos. Hæreticorum  
autem

autem dissidia figurabat Core, qui non recessit à tabernaculo Dei corpore, licet animo esset seiunctissimus. Siquidem hæretici affectant videri veræ religionis assertores. Et quemadmodum ille conabatur Aaron à sacris submovere, ita isti persuadere conantur, catholicę doctrinę sectatores esse tyrannos & hostes ecclesiæ. Et quemadmodum unusquisque hæresiarcha clamat, hic est Christus, nõ isthic: Ita Core grex dicebar, omnis multitudo sanctorum est, in ipsis est dominus. Ante redemptoris adventum apud Iudæos Sadducæi & Herodiani habebant sua tabernacula, sed nec amabilia, nec speciosa. Cæterum iam per orbem diffundente sese luce Evangelica, quam multa, quam abominanda tabernacula hæreticorum constiterunt adversus tabernaculum Dei? Quis non inhorrescat, si vel legat quæ turpitudinum scena fuit in tabernaculis Ophitarum, qui serpentem pro Christo venerabantur? Cainorum, qui Cain paricidam & Iudam proditorem inter præci-

præcipuos habebant sanctos? Nicolaitarum, quibus uxores erant communes? Adamianorum, qui nudi cum nudis fœminis ad sacra conveniebant, hac scilicet specie Adam & Evam adhuc innocentes è paradiso nobis repræsentantes? Et tamen iidem nuptias averfabantur. Quæ dogmatum portenta, quæ monstra turpitudinum peragebantur in tabernaculis Basilidis, Colarbas, Priscillæ, ac Marcionis? Manichæorum fœda mysteria, quis posset absque nausea vel legere vel recensere? Quis non execretur Sabellinorum, Arianorum, Eunomianorum blasphema in Christum, aut in totam potius trinitatē, conventicula? Quibus præstigiis, quibus technis, qua crudelitate conati sunt catholicam veritatem obruere? Operæpretium fuerit unum & alterum illorum stratagemata referre, ut hinc fiat coniectura, quantum malitiæ texerunt illa tabernacula. Athanasium invictum catholicæ veritatis propugnatorem, quoniam scripturis & argumentis superare non

B value-





valuerunt , fictis criminibus statuerant opprimere. Constantium Cæsarem maliciosis suggestionibus sic irritarant in virū sanctissimum , ut iusserit apud Tyrum coacto concilio cognosci de Athanasio , delegato ad id comite quodam à latere suo , qui cognitioni præsideret. Duo præcipua crimina intentabantur, mulier vi cōstuprata, & brachium homini defuncto abscissum in usum maleficarū artium. Conducere mulierculam quæ huius tragœdiæ partem ageret , non erat difficile: sed ad probandum maleficii crimen accerkerant Arsenium quendam olim Athanasii lectorem , qui veritus episcopi quem offenderat correptionē ab eo profugerat. Hunc diebus aliquot abditum servarant Arianī , ut cum fide mentirentur esse mortuum. Is tamen ut intellexit , quid in Athanasium molirentur , sive exhorrens facinoris atrocitatem , sive cupiens hac occasione cum episcopo suo redire in gratiam , noctu clam profugit è latebris , & Tyrum ad Athanasium navigio pervenit , eique

rcm

rem omnem aperit. Ibi vir ut insigniter pius, ita mire solertis ingenii, quippe qui iuxta præceptum domini columbinam simplicitatem cum serpentis prudentia coniunxerat, iubet Arsenio, ut abdat sese, donec in rem præsentem evocaretur. Coacto concilio prodit mulier, infertur horrendo spectaculo locus defuncti, ostenditur brachium hominis resectum loculo impositum. Horror etiam bonorum animos pervaserat. Quis enim crederet, illa fingi à sacerdotibus? Mulier, quæ fuerat edocta, narrat, se quondam Athanasium excepisse hospitio, & ab eo noctu, quum nihil ab illo metueret, per vim fuisse constupratam. Athanasius introductus est, ad hæc responsurus. Is qua præditus erat solertia, submonet Timotheum presbyterum suum, ut ipso tacente mulieri respondeat. Sciebat enim, se mulieri ne de facie quidem notum esse. Quum illa perorasset accusationem, Timotheus, tu ne inquit, mulier, ais te à me vi constupratam? Tum illa muliebri pervica-

cia, Tu, inquit, tu inquam illo loco, illo tempore, per vim meam pudicitiam contaminasti. Erubere quidam, tam facile detecta mulieris calumnia. Nec tamen absolutus est Athanasius, nec ad calumniæ poenam vocata mulier, quod iidem essent iudices qui accusatores. Itum est ad secundum crimen: En, inquiunt, ipsa res loquitur: hoc, est Arsenii brachiū, quod in quem usum amputaris, tu nobis Athanasi exponito. Hic simili solertia vir prudens rogat illos, num satis nossent Arsenium, cuius hoc esset brachium. Respondent quidam, se probe nosse Arsenii faciem. Petit Athanasius, ut liceret sibi accersere quendam, quo ad eam causam haberet opus. Concessum est. Introductus est Arsenius. cuius facie nudata, Ecce, inquit, Arsenius vivus, ecce brachium dextrum, ecce sinistrum incolume: unde vos istud brachium amputaveritis, ipsi narrate. Quid hic expectas, ut hic Athanasius fuerit expeditus? Immo discerptus erat inimicorum manibus, ni Archelaus Orientis comes, qui

qui & ipse ei consilio præsidebat, virum sanctum è manibus illorum extractum per occultos meatus dimississet. Quid autem tergiversari poterant, tam evidenter confutati? Vociferabantur, hominem esse magum, ac præstigiis imponere oculis hominũ, nec ullo pacto commitendum esse, ut talis artifex viveret. Rursus coacto concilio, perinde quasi legitime convictus, cõdemnatur Athanasius. Spargitur per universum orbem fœdus rumor: per imperiales præfectos, per omnes latebras, terra marique, quæritur vir cœlo dignus, propositis etiam præmiis, qui vivum adduxissent, aut si minus id possent, qui mortui caput attulissent. Quid? simile Iudæi moliti sunt in Christum. Imo quisfando audivit inter ethnicos facinus execrabilius? Specimen dedi: talia sunt schismaticorum & hæreticorum tabernacula. Quid nunc commemorem de Circumcellionũ furiosa crudelitate? Quid de Donatistarum varicie, technis ac violentia? Hæc non ignorant qui legerunt Augustini de

his actis commentarios. Sed hæc vetusta. Magis deplorandum, quod nostra etiam memoria, reperta sunt conventicula, in quibus noctu post decantatas Dei laudes, extinctis lucernis, promiscua venere viri cum fœminis miscebantur. Sit hoc leve. In quibus matres ultro tradebāt suos infantes occidendos, & tam immane facinus hilari vultu spectabant, persuasæ, sic interfectos inter præcipuos sanctos habendos. Quæ dementia videtur ex heresi quæ *ἡ ὁμολογία* dicitur traxisse originem, qui Eucharistiam ex farina sanguine infantis macerata conficere solent. Eum minutis punctationibus excipiebant. Quod si puerum eū mori contigisset, pro martyre colebatur. Vides, in quæ portenta devolvantur homines, qui semel deserto Dei tabernaculo, sese manciparunt tabernaculis impiorum. Iam si præstanti forma puellam, cū anu deformi componas, & illa videbitur amabilius, & hæc aspernabilius. Ita propheticus ac spiritualis oculus cōferens synagogas Satanæ cum tabernaculo

naculo dei, in quo regnat cœlestis  
 illa veritas, in quo exuberat pax exu-  
 perans omnem sensum, in quo fervet  
 charitas fuci nescia, triumphat fides  
 invicta, in quo uno ore unaque a-  
 nima canuntur laudes dei, magis e-  
 rumpit in vocem, *Quam amabi-*  
*lia tabernacula tua, domine virtut-*  
*tum!* Piorum enim concordia cœle-  
 stis illius ecclesię imaginem nobis re-  
 præsentat, in qua nulla est opinio-  
 num dissensio: iam enim gloriam do-  
 mini non ænigmate, sed revelata fa-  
 cie speculantur: summa animorum  
 concordia, summa charitas: uno ore  
 eademque mente deum hymnis ce-  
 lebrant. Adde huc, quod spiritualis  
 oculus, quem perspicacem reddit lu-  
 men fidei, plus cernit quam oculus  
 corporis. *Quid* igitur ille videt præ-  
 terea? Videt Christum, in medio suo-  
 rum residentem, ac benedicentem cœ-  
 tui suo. quemadmodum ipse pronun-  
 ciavit in Evangelio: Ubique sunt  
 duo vel tres congregati in nomine  
 meo, ibi sum in medio eorum. Videt  
 Angelos protectores ac ministros

sanctæ congregationis, magna frequentia summaque reverentia versantes. In tabernaculis impiorum omnia diversa sunt: in quibus præsidet satanas, nunquam nocentior, quam quum se transfigurat in angelum lucis: intersunt impii spiritus ad omne malum instigantes. Ut ne iam commemorem diversum exitum. Quid Core & illi cõiuratis acciderit, sciunt omnes. Horribile spectaculum erat, terram dehiscere, ac viva corpora devorare, aut igni cœlitus emisso, aut fulmine, consumpta tot hominũ millia. Nam postridie recrudescente populi seditione, quatuordecim millia perierunt incendio cœlesti. Sed horribilius est, & animam & corpus mitti in gehennam. Nec omnino falsum est, quod dicunt quidam, invisibilem esse ecclesiam. Solus enim Deus introspicit corda hominũ, ac vere novit, quĩ sint ipsius. Multis tamen argumentis sæpe deprehenditur, ubi sit ecclesia Dei, ubi synagoga satanæ. Multorum enim peccata præcedentia sunt ad iudicium. Sed hæc ipsa ecclesia

sia visibilis quę bonis habet admixtos malos, quantum habet alacritatis ac maiestatis, quoties ad pietatis cultum convenit? Ubi is cui datum est donum prophetiæ, sincere tractat ac dispensat verbum Dei, populus religiosa attentione ac reverētia auscultat, non ut verbum hominis, sed ut verbum Dei. Quum interim qui docet, sic afficitur, ut sentias Christi spiritum per os hominis loqui. Interea videre est præsentem spiritus energiam in auditoribus. Alii suspirant, aliis erumpunt lachrymæ, aliis hilarescit facies. in summa, dicas omnes transfigurari. Rursum quum in solenni culru, suo quisque munere fungitur, alius recitat sacram lectionē, alius decantat laudes Deo, alius orat totius multitudinis nomine, tractatque mysteria, alii hæc agenti subserviunt, populus interim religioso silentio veneratur hæc omnia. Quis hæc spectans non fateatur, amabilia esse tabernacula Dei? Itidem quum procedit solennis ecclesiæ supplicatio decēti digesta ordine, et-



iam ii qui tantum spectandi gratia  
 prospiciunt, venerabunda quadam  
 alacritate tanguntur. Postremo o-  
 mnis legitimus conventus hominum  
 ad rem honestam habet dignitatem  
 quandam, atque adeo lætitiā. Cu-  
 iusmodi sunt cœtus discipulorum ad  
 professionem, aut diversorum homi-  
 num ad disputationem publicam. Al-  
 cibiades quum primum esset verba  
 facturū apud populū Atheniensem,  
 sensit animi trepidationem. Eam illi  
 sic exemit Socrates. Rogat num pos-  
 set contemnere coriarium aliquem?  
 Respondit, maxime. Num figulū?  
 respondit, facile. Num fabrum aut  
 cementarium? Quum de singulis in-  
 terrogatus respondisset, apud quem-  
 vis istorū posse intrepide dicere: At-  
 qui, inquit Socrates, ex his constat ille  
 populus quem tu vereris. Quod si per  
 se contemptissimis hominibus ipse  
 conventus conciliat dignitatem ac  
 reverentiam, quanto venerabilior  
 est cœtus piorum hominum ad cul-  
 tum Dei viventis congregatorum?  
 Tantam autem vim habet chorus

una-

unanimiter Deo fidentium, ut prophanos etiam rapiat in admirationem sui, sicut testatur Paulus, Idiotam aut incredulū ingressum ecclesiam sanctorum, procidere in faciem suam, & adorare deum, profitentem quod vere deus sit in medio suorum. Balaam propheta quidem erat, sed impius. Is tamen è monte conspectis Israelitarum tabernaculis coactus est exclamare; *Quam pulchra tabernacula tua, Iacob, & tentoria tua, Israel!* Videbat idem felicem illorum mortem qui perseverant in castris ecclesiæ. *Moriatur, inquit, anima mea morte iustorum, & fiant novissima mea horum similia.* Conspexit horum tabernaculorum pulchritudinem propheta sanctus, quum exclamat in Cantico graduum: *Ecce quam bonum & quam iucundum, habitare fratres in unum!* Vidit & Petrus, sed tanquam per somniū, quum in monte contemplatus esset domini gloriam, & audisset Moysen ac Heliam, de gloria mortis Dominicæ colloquentes: *Domine, inquit, bonum*  
B 6
est,

est, nos hic esse : faciamus hic tria tabernacula. Illic demum vera est concordia, ubi lex & prophetæ consentientes, Christum novi testamenti ministrum, non litera sed spiritu prædicant. Hoc nec fit in synagogis Iudeorum, qui legem detorquent, non ad Christum, sed ad nescio quem alium Messiam, quem tot iam seculis frustra expectant infelices : nec in tabernaculis Manichæorum, qui totum vetus testamentum ut non à Deo sed à principe tenebrarum proditum reiciunt, novum ceu multis locis falsatum suo arbitrio probant aut improbant. Denique in nullis hæreticorum tabernaculis, ubi scripturæ non ad Christum qui est veritas accommodantur, sed ad sensum humanum detorquentur. Id enim semper fuit hæreticorum proprium. Siquidem Priscillianistæ nullius libri vel veteris vel novi Testamenti auctoritatem reiciebant, sed quum absurdissima docerēt, quicquid cum ipsorum dogmatibus pugnabat, falsa interpretatione ad alienum sensum deprava-

DE ECCLES. CONCORD. 37  
pravabant. Verum ut ad Psalmi te-  
norem redeam; Si tabernacula Dei  
intelligis Ecclesiam adhuc in terris  
militantem; puta, hæc dici, vel à ca-  
techumeno, vel ab ethnico aut Iu-  
dæo resipiscente, vel à peccatore sive  
hæretico schismaticove redeunte ad  
cor. Sin de ea parte ecclesiæ, quæ iam  
triumphat cum Christo; puta, quem-  
vis pium hominem, cum Paulo cu-  
pientem dissolvi & esse cum Christo,  
dicere, *Quam amabilia tabernacu-  
ta tua, domine virtutum!* Abruptum  
sermonis initium declarat desiderii  
magnitudinem à profunda contem-  
platione proficiscentis. Nec ociosum  
est quod alloquens dominum, dicit,  
*Tua. Quicquid in ecclesia, virtutis,  
roboris, aut felicitatis est, domini est,  
non hominum. Ille gratis sibi rede-  
mit ecclesiam, ille gubernat, ille tue-  
tur adversus omnes procellas. Et qui-  
cunque ecclesiæ resistit, non rebellat  
hominibus, sed Deo. Hoc aperte lo-  
quitur per os Zachariæ cap. 2. Qui  
tetigerit vos, tanget pupillam oculi  
mei. Et Paulus audit: Saule Saule,  
quid*

quid me persequeris? Rursus, quem-  
 admodum in Evangelio agnoscit sibi  
 præstitum quicquid beneficii colla-  
 tum fuerit vel in infimum Christia-  
 ni nominis professorem, ita quicquid  
 malorum ingeritur in ecclesiam ca-  
 tholicam, sibi ingestum esse deputat.  
 Talem præsidem ac propugnatorem  
 quum habeat ecclesia catholica, fru-  
 stra sunt omnes impiorum conspira-  
 tiones adversus illam. Eoque Psalmus  
 addit, domine virtutum! Virtutes au-  
 tem hic appellat, non ἀρεταί, quæ op-  
 ponuntur vitiis, sed δυνάμεις, quæ vox  
 sonat potentiam. Atque hoc cogno-  
 mento sacræ literæ nonnunquam de-  
 signant deum. Veluti Psalmo 23.  
 Dominus virtutū ipse est rex gloriæ,  
 Δυνάστης. Præcesserat enim, Dominus  
 fortis & potens, dominus potens in  
 prælio. Et in veteris testamenti volu-  
 minibus frequenter appellatur do-  
 minus Sabaoth, quod Hebræis sonat,  
 virtutum sive exercituum. Δυνάμεις in  
 mysticis literis interdum declarat  
 præcipuos angelos, quorum ministe-  
 riis deus utitur ad electorum suorum  
 prote-

protectionem. Hunc exercitum vidit Helizeus, quum † puero ad cōspectum Syrorum exercitum exanimato diceret, Noli timere, plures sunt nobiscum quam cum illis. Et ad prophetæ preces aperti sunt oculi ministri. mox & ipse vidit montem plenum equitibus & curribus igneis. Nemo, inquit Christus, potest eos de manu mea eripere, quos pater dedit mihi. Concinit his canticum graduum. Nisi dominus ædificaverit domum, in vanum laborant qui ædificant eam, &c. Tempore Pauli nec opibus, nec viris, nec ullis mundi præfidiis erat munita ecclesia, & tamen magna fiducia loquitur, \* Si Deus pro nobis, quis contra nos? Moxque eo fiduciæ provehitur, ut quum ecclesia tot malis undique premeretur, non vereatur dicere: Certus sum, quod neque mors, neq; vita, neque angeli, neque principatus, neque instantia, neque futura, neque altitudo, neque profundum, nec ulla creatura alia poterit nos separare à charitate Dei, quæ est in

† 4. Reg. 6.      \* Rom. 8.

in Christo Iesu , domino nostro ,  
 Unde tanta fiducia, Paule, inter tot  
 mortes, tot pericula, & foris & in-  
 tus urgentia? Unde isti spiritus, pau-  
 cis, indoctis, privatis, tenuibus &  
 oppressis? Ex nobis, inquit, nihil  
 possumus, sed dominus noster domi-  
 nus est virtutum. Sive igitur accipias  
 virtutes angelos, ecclesiæ protecto-  
 res, sive miracula: uterque sensus de-  
 clarat, ecclesiæ dominum prorsus in-  
 victum esse, quum sit omnipotens, ad  
 cuius nutum præsto sunt omnes an-  
 gelorum legiones, & qui facit mira-  
 bilia magna solus, quique solus quic-  
 quid voluit fecit, in cœlo pariter at-  
 que in terra. Ecclesiæ primordia mi-  
 raculis, non humanis præfidiis inva-  
 luerunt. Et quoniam quicumque pie  
 vivunt in Christo Iesu, impiorum  
 persecutionem patiuntur, humiles  
 iuxta mundum, ac pauci præ his qui  
 oppugnant; ad consolationem gre-  
 gis pusilli dictum est, domine virtu-  
 tum. Hic est enim ille qui dicit in  
 Evangelio, Nolite timere, pusillus  
 grex: quia vestrum est regnum cœlo-  
 rum.

rum. Et rursus, Confidite, quia ego vici mundum. Solus hic potuit alligare fortem, domumque illius ac supellectilem diripere. Aestimati, inquit, sumus sicut oves occisionis. Quod animal ove imbecillius aut magis imbelle? Sed quid dicit Paulus, iam è lupo factus ovis? Arma † militiæ nostræ non carnalia, sed potentia Deo, ad destructionem munitionum: consilia destruentes, & omnem altitudinem extollentem se adversus scientiam Dei; &c. Eodem in loco obiurgat Corinthios, quod quum adhuc essent carnales, ea tantum viderent, quæ erant secundum faciem; atque è rebus externis æstimantes Apostolos, quod non solum iuxta mundum tenues essent, & humiles, verum etiam afflicti, contemnerent eos; quum essent spiritualibus opibus ditissimi, spiritualibus armis munitissimi. Ita quorum oculos occupavit huius mundi potentia, quum metiuntur ecclesiam Christi externa specie,

† 2. Cor. 10.



specie, non solum contemnunt eam, verumetiam abhorrent & averfantur. Tales erant olim qui baptismum in extremæ vitæ diem studio proferebant, nec nisi tristes ac deplorati veniebant ad atria domini. At qui spiritualibus oculis cernit gloriam filiae regis ab intus, dicit cum Propheeta; Concupiscit & deficit anima mea in atria domini. Mediocria bona moderatis effectibus expetuntur: at illa quæ nec oculus vidit, nec auris audivit, nec in cor hominis ascenderunt, quæ Deus præparavit diligentibus se, ingenti desiderio expetantur oportet. Hanc desiderii magnitudinem propheta expressit, addens, & deficit in atria domini. *ἡττοδυσμία* vulgare est, sed *ἐκλείπτει* non est nisi supra humanum modum desiderantium. Græci *λεπτοδυσμία* appellāt, quum propter vehementem & subitum spirituum motum homo destitutus animo sibi excidit ad tempus. Eam affectionem aliquando gignit in homine vehemens pavor, aut admiratio: unde stupefactos & attoni-

tos

tos dicimus. Nonnunquam ingens  
 dolor, aut lætitia præter spem obie-  
 cta, aut amor impotens. Unde & in  
 prophanis tragædiis, Phædra ad  
 Hippolyti conspectum concidit, exa-  
 nimi similis. Et historiis proditum  
 est, mulierem ad inexpectatum filii  
 sui introitum, quem acceperat in  
 bello cecidisse, fuisse exanimatam. In  
 eundem sensum usus est hoc ver-  
 bo Psalmo x18. Defecit in salutare  
 tuum anima mea Defecerunt oculi  
 mei in eloquium tuum. Huc pertinet  
 quod sponsa loquitur in Cantico So-  
 lomonis. Fulcite me floribus, stipate  
 me malis, quia amore langueo.  
 Quæ fulciri postulat, periclitatur ne  
 concidat. Idem enim accidit in spi-  
 ritualibus quod in rebus externis.  
 Requiritur moderata cognitio inter  
 potentiam & obiectum. Alioqui, si  
 quod sensui obiicitur careat modo,  
 sensum obruit: veluti sol nulla nube  
 temperatus, si intendas oculos, cor-  
 rumpit visum: & sonitus immodicus  
 adducit surditatem. Sicut literis eru-  
 ditorum proditum est, apud Stadiſin  
 oppi-

oppidum, ubi Nilus se per cataractas ingenti fragore præcipitat, indigenas nasci surdos. Item illud sæpenumero videmus accidere, ut qui vehementer intendunt animum rebus supra modum subtilibus investigandis, incidant in dementiam. De Aristotele literis proditum est, vere an falso, nunc non excurio, quod posteaquam ingenium suum diu multumque torferat studio pervestigandi causas, quæ mare Euboicum secus quam alia maria septies in die decurreret ac recurreret, neque quicquam proficeret, sese in ipsum abiecit mare, dicens, quando ego non te capio, tu capies me. Quo minus mirandum est, si, qui non contenti credere, quæ nobis tradidit scriptura, de divina Triade multa scrutantur, humanæ mentis captum in immensum excedentia, in delirationem incidunt, ut iam communi quoque sensu careant, qui supra humanum sensum sapere voluerunt. De quibus vaticinatus est Solomō: \* Qui scrutator est maiestatis, opprimetur à gloria.

\* Prov. 25.

DE ECCLES. CONCORD. 45  
gloria. De iisdē Esaias: † Qui dat se-  
cretorū scrutatores, quasi nō sint. Sed  
iamdudum audire cupis, quę sint ista  
pręclara bona, sēsū humanū exupe-  
rātia, quę cōspexit hic qui tanto desi-  
derio gestit in atria domini ingredi, ut  
præ admiratione deficiat animo. An  
quisquā digne valeat æstimare, quāta  
sit dignitas, quantaq; felicitas, homi-  
nē peccatorē, ac Sataneque laqueis irreti-  
tum, per fidem ac baptismum gratis è  
mācipio diaboli cooptari in numerū  
filiorum Dei in situm corpori Christi,  
unum cum illo fieri? ex hærede ge-  
hennæ fieri hæredem regni cœlestis?  
allegi in illud gloriosum contuber-  
nium sanctorum omnium, qui à con-  
dito mundo fuerunt, quique usque  
ad consummationem seculi futuri  
sunt, sive in cœlis, sive in terris? Tan-  
tus honos tantaque beatitudo præ-  
statur catechumenis in atriis domini,  
priusquam admittantur ad penetra-  
lia. Nam atrium propriè nobilium æ-  
dium ingressus dicitur. Unde servi  
atrienses, qui atrio præsunt. Itaque  
qui

† *Esai.* 40.

qui fidei oculis perspicit maiestatem  
 domus Dei, quid mirum, si ad res di-  
 vinas & humana natura superiores  
 animo deficit, & affectu impotenti  
 raptus sese præ desiderio non capit?  
 Horatius homo facundus ad Mæce-  
 natem accitus pauca loquitur, idque,  
 ut ipse ait, singultim. Nec raro acci-  
 dit viris alioqui magnis & eruditis,  
 ut in celebri confessu pontificum aut  
 principum dicturis, vertigo oboria-  
 tur, sibi que repente sic excidant, ut  
 quæ mensibus aliquot meditati sunt  
 proloqui non possint. Sed quid illius  
 cōfessus maiestas ad ecclesię gloriam?  
 Certius autem cernitur oculis fidei  
 quam oculis corporis. Proinde qui  
 frigidi & invitis similes veniunt ad  
 baptismum, nondum pervident ad  
 quantam felicitatem recipiantur,  
 eoque indigni sunt qui potiantur ad  
 quod invitantur. Age si cui plebeio  
 in tetro carcere marcescenti veniat  
 nuncius, dicens, Bono esto animo:  
 hodie liber Regiam ingredieris, fu-  
 turus inter aulæ proceres, & regi  
 charus : nonne periculum esset, nē  
 subito

superest, nisi ut totus deficiat in  
 concidatque, quo renovatus &  
 us spiritu Dei, per fidem per-  
 at, quam ingentia sunt quæ divi-  
 nignitas nobis per filium gratis  
 tur, si digne accedamus ad illius  
 nacula. Sic deficere proficere  
 exanimari vivificari est, sic sibi  
 ere, est reddi sibi, sic concidere,  
 gi, sic suis viribus destitui, est  
 tum fieri in Christo, sic emori,  
 Deum transformari. Nisi enim  
 ificetur quod animale est, non  
 tur quod est spirituale. Itidem  
 bus naturæ, corrumpitur siccum  
 forme semen, ut exurgat viridis  
 r. Emoritur deformis eruca, ut  
 tolet nitidus ac picturatus papi-  
 Marcescit cicada iam anus, ut ex  
 exuvio, prodeat nova succulen-  
 modulatrix. Posteaquam igitur  
 s homo defecit, & defecit in ta-  
 nacula Dei, tunc caro simul & a-  
 ia & cor illius exultat in Deo vi-  
 Spiritus enim Dei per fidem in-  
 at omnia, fitque totus homo no-  
 creatura in Christo Iesu. Nam est

C

caro

fidem reiicit, & humanis rationibus scrutatur divina, animalem appellat. Sic & caro hominis crassius quiddam sonat, cui perhenne bellum est cum spiritu dei. Cordis vero nomine spiritum hominis sive mentem significare videtur. Spirituum enim vitalium iuxta Physicos fons in corde est. Est igitur caro, quæ, autore Paulo, regnum Dei non valet possidere. Est & caro, cuius consortium † non patitur spiritus dei. Puta, hanc esse infimam hominis partem. Sic est & anima, quæ repellit spiritum Dei, quemadmodum ait sanctus Iudas, eos ceu digito notans, qui sectantes ea quæ sunt huius mundi, per sectas & schismata recedunt ab ecclesiæ consortio. Hi sunt, inquit, qui segregant semet ipsos, animales, spiritum non habentes. Iam est & cor hominis, in quod non ascenderunt ea quæ Deus præparavit diligentibus ipsum. Quum igitur totus homo, ut omnes suas vires in unum conferat, non sit capax donorum cœlestium; quid

† Gen. 6.

quid superest, nisi ut totus deficiat in se se concidatque, quo renovatus & erectus spiritu Dei, per fidem perspiciat, quam ingentia sunt quæ divina benignitas nobis per filium gratis largitur, si digne accedamus ad illius tabernacula. Sic deficere proficere est, sic exanimari vivificari est, sic sibi excidere, est reddi sibi, sic concidere, est erigi, sic suis viribus destitui, est robustum fieri in Christo, sic emori, est in Deum transformari. Nisi enim mortificetur quod animale est, non exoritur quod est spirituale. Itidem in rebus naturæ, corrumpitur siccum & informe semen, ut exurgat viridis arbor. Emoritur deformis eruca, ut provolet nitidus ac picturatus papilio. Marcescit cicada iam anus, ut ex sicco exuvio, prodeat nova succulenta modulatrix. Posteaquam igitur totus homo defecit, & defecit in tabernacula Dei, tunc caro simul & anima & cor illius exultat in Deo vivo. Spiritus enim Dei per fidem innovat omnia, fitque totus homo nova creatura in Christo Iesu. Nam est

C

caro



caro quæ videt salutare Dei, & iuxta Paulum est corpus spirituale, & est cor mundum quod in nobis creat Deus, & est spiritus rectus quem innovat in visceribus nostris. Hinc nimirum nascitur illa spiritualis exultatio, non in opibus aut honoribus aut voluptatibus huius mundi, non in forma viribusque corporis, non in sapientia humana, sed in Deo vivo, qui vitam dat mortuis. Is demum tuto gloriatur, qui, beato Paulo monitore, in domino gloriatur. Scriptura frequenter hoc vivi cognomen attribuit Deo, non tantum ad differentiam simulacrorum mortuorum, sed etiam ad declarandum illius omnipotentiam. Vivum enim dicitur quod est efficax. Non est magnum, si credamus, Deum esse viventē, quum vivant & bruta animalia, sed hic solus sic est vivus, ut sit ipsa vera vita, unde velut à fonte manat omnibus vita. Ego, inquit dominus, sum via, veritas & vita. Mortificato igitur veteri homine & sepulto in baptismo, novus homo in se quidem mortuus, sed

DE ECCLES. CONCORD. 51  
sed in se viventem habens Christum,  
totus exultat, gratias agens ei cuius  
gratuita munificentia sic transforma-  
tus est. Sara enim non genuit Isaac,  
hoc est, gaudium spiritus, nisi po-  
steaquam illi defecerant muliebria.  
Sed unde genuit? ex Abraham, car-  
ne emortuo, sed fidei vigore vivo vi-  
vidoque. Cæterum ipse propheta  
causam huius exultationis maluit  
per allegoriam nobis exprimere: Et-  
enim passer invenit sibi domum, &  
turtur nidum sibi, ubi ponat pullos  
suos. Quam magnificam rem quam  
humili tropo expressit spiritus pro-  
pheticus! Quid est igitur quod sic ex-  
ultas, sic gaudio gestis ac triumphas,  
qui paulo ante defeceras? Quia pas-  
ser, inquit, invenit sibi domum, &  
turtur nidum, ubi ponat pullos suos.  
Naturę instinctu omnia animantium  
genera parant sibi locum aliquem  
in quo post labores tuta conquiescāt:  
& in hoc mira ingeniorum varietas.  
Pleraque procul in avia & impedita  
loca recedunt, quæ vix à venatoribus  
pervestigantur, ut cervi. Apri frutice-

tis abdunt sese, Leones ac dracones speluncarum recessibus. Lepus averso saltu mire fallit venatorem, ne deprehendat cubile. Serpens in cavernis suis tutus est. Cuniculi subterraneis labyrinthis sese tuentur. Formicæ in cavis effossis per hyemem latitant. Apes in cavis arboribus extruunt cellas suas, easque crusto tenaci & amaro foris oblinunt, quo tutæ sint adversus iniuriam. Habent & pisces recessus ac latebras suas. Avium magna pars in saltus inaccessos aut in loca palustria recipiunt sese. Aquila in præruptis ponit nidum, perdix humi. Alcyones in mari suspendunt nidum, tanta arte contextum, ut ne ferro quidem rumpi possit: nec adhuc à quoquam deprehensum est, unde conficiant fluitantem domunculam. Complures surculis ac stipulis arte congestis in ædium fumariis aut in arbore suspensis nidulantur. Passeres & hirundines nos quoque docuerunt ex uda argilla paleis temperata struere macerias. Et ne singula cōmemorando siam prolixior, unumquod-

quodque animal, ubi repperit in quo tuto conquiescat, suamque sobolem educet, suam felicitatem assequutum est, nec amplius quicquam desiderat. Habet enim naturæ principia, quæ sunt, tueri sese, & suam propagare speciem. Sed mirabitur aliquis, quor ex omnium animantium generibus solæ nomenclentur aves, & in his passer tantum & turtur. Inter omnia animantium genera minutissimum est avium genus. Habet terra elephantos, mare balænas, immani magnitudine. Inter aves autem minimus est passer, cuius vilitas, & vita solitudinis expertus, nobis ore domini commendata est. Non amat spiritus sanctus animos fastu turgidos, corporaliūque bonorum amore gravatos, & ob id humi gradientes: volucres amat animas, cœli commercio gaudentes: amat in suis oculis pusillos, iuxta mundum contemptos, amat totos de Dei providentia pendentes. Si Deus sic vestit, sic alit passerculos, quorum bini asse veneunt, quid tu te discrucias, in extremam se-

nectam, ad quam fortasse nunquam  
 perventurus es, & in liberōs, nepo-  
 res ac pronepotes, per fas nefasque  
 congerens divitias, fortassis ad eos  
 perventuras, ad quos tu minime vel-  
 les? Et si expasseris unus non de-  
 cidit in terram: nam hoc interdum  
 fit, ex immodico, ut quidam tra-  
 dunt, coitu: quid tu, cooptatus in  
 gregem illorum, de quibus servator  
 pronunciavit, ne pilum quidem ca-  
 pitis periturum sine providentia pa-  
 tris, ad genethliacos & astrologos  
 curris, metuens ne ante diem tuum  
 pereas? Turtur hoc habet commu-  
 ne cum columbis, quod suspirium  
 edit pro cantu, quod adulterium ne-  
 scit, imo ne digamiam quidem: fer-  
 tur enim, compare mortuo, nulli  
 alteri se iungere. Quare vox huius  
 grata est sponsæ, in mystico Solomo-  
 nis cantico. Vox, inquit, turturis  
 audita est in terra nostra. Alioqui ver-  
 nis mensibus longe dulcius canunt  
 alaudæ ac lusciniæ, sed sponsæ pla-  
 cent turturum suspiria. Quotquot  
 enim contemnunt hunc mundum  
 spe

spe vitæ cœlestis, quamdiu versantur in hoc corporis tabernaculo, ingemiscunt gravati, eo, sicut ait† Apostolus, quod nolint expoliari, sed supervestiri, ut absorbeatur quod mortale est à vita. Adde quod in veteri testamento turtur pauperum erat oblatio, ut utilitas huic avi sit cum pascere communis. Sibi vilissimus sit oportet qui vere agnoscit in se nihil esse boni. Quid Paulo sublimius? tamen ut passerculus loquitur, quum ait, sese abortivum & Apostolorum minimum ac prorsus indignum Apostoli nomine, denique reiectamentum ac peripsema huius mundi. Sed hæc vilitas una res est, quæ nos reddit preciosos in oculis Dei. Hæc exiguitas magnos & excelsos facit apud iustum iudicem. Vis audire huius passerculi magnitudinem? Omnia, inquit, possum in eo qui me corroborat. An non dicas, hic è passerculo aut turture factum leonem? Ex diametro pugnant iudicia Dei & iudicia huius mundi. Itaque sicut mundus

C 4

amat

† 2. Cor. 5.

amat ac magnificat eos qui de mundo sunt, ita odit ac contemnit eos qui de mundo non sunt. Circumierunt, inquit \*, in pellibus ovium & caprarum, egentes, angustiiati, afflicti, in solitudinibus errantes, in montibus & speluncis & cavernis terræ. Quid contemptius? sed audi dignitatem. Quibus, inquit, dignus non erat mundus. Quid Paulo iuxta mundum abiectius, qui sese appellat peripsēma, hoc est, purgamentum quod abiicitur? Sed idem ille tam despectus mundo, quanti fuit apud Christum? qui testatur, illum sibi vas esse electū. Sed quid de cæteris sanctis loquor, quum ipse gloriæ dominus dicat per os David: Ego sum vermis, & non homo, opprobrium hominum & abiectio plebis. Atqui idem ille mundo contemptissimus est, in cuius nomine se flectit omne genu, cœlestium, terrestrium & inferorum, quique pari consortio in gloria est Dei patris. Nullus igitur pie vivens displiceat sibi, si contemptus & invisus est iis, qui

qui hauserunt spiritum huius mundi. Est quidem pro viribus enitendum, ne cui præbeamus offendiculum, at tamen magnum est argumentū, nos esse gratiosos apud Christum, si citra culpam nostram mundo simus invidiosi. Quum mundum dico, non designo professionem, vestem, cibos, aut titulum, sed animum Christi spiritu vacuum. Vulgus enim hac voce quemadmodum aliis multis abutitur, mundanos appellans, qui sacris initiati non sunt, aut qui monasticam vitam professi non sunt. Professos autem appellant extramundanos & mundo mortuos. Atqui sicut sub omni veste, quantumvis sit vilis aut *isoyopiric*, latere potest mundanus animus, ita sub veste quamvis laica, aut etiam militari, latere potest animus à mundo alienus, etiamsi pluma struthiocameli volitet in pileo secto. Sed interim fortassis subibit alicuius animum admiratio, quo modo repente, à tanta exultatione totius hominis, ad fuspriorum mentionem dilapsi simus, velut à calcaria,



quod aiunt, in carbonariam. Quoniam hæ duę res, licet inter se pugnare videantur, tamen ita sibi connexę sunt, quandiu versamur in hoc mortali tabernaculo, ac thesaurum cœlestem portamus in vasis fictilibus, ut altera ab altera seiungi nequeat, imo quod maius est, altera vicissim ex altera nascatur. Omnis nostra exultatio, qui per fidem ambulamus, est in spe futurorum bonorum. Quę quo clarius cernimus oculis fidei, quoque certius speramus, hoc maiora trahimus suspiria, sicuti vehementibus desideriiis omnis molesta est dilatio. Quoque magis ad illam vitam suspiramus, hoc magis exultat cor & caro nostra in Deo vivo, dum in mundo tristitiam habemus, in Christo solatium. Nihil hic perfectum est, vix quicquam tutum. Ex parte cognoscimus, & ex parte prophetamus. Et qui stat, huic videndum est ne cadat. In medio laqueorum ambulamus: quos omnes effugere difficillimum est, ne dicam impossibile. At hæ molestiæ quas hæc vita secum defert, etiam si  
non

non tantum valeant, et nos abducant à charitate, quæ est in Christo Iesu, tamen ab illa spiritali mentis exultatione frequenter avocant, & cogunt ingemiscere desiderio eius dici, quo continget quod perfectum est. Quis enim à tali exilio non suspiret ad talem patriam? Vis audire turturem suspirantem? lege Psalmum 119. Heu mihi quia incolatus meus prolongatus est: habitavi cum habitantibus Cedar, multum incola fuit anima mea. Domine libera animam meam à labiis iniquis, & à lingua dolosa. Piis hominibus magna pars afflictionum est, perpeti mores & linguas malorum. Hic enim locum habet quod ait Ecclesiastes: qui apponit scientiam, apponit dolorem, & in multo sensu multa indignatio. Lumen solis omnibus commune est, at non omnibus commune lumen fidei. Cedar Hebræis tenebras sonat. Quicquid autem moliuntur, qui mundi huius spiritum habent, mera caligo est, oderūt lucem veritatis, ac magis amāt

tenebras. Et quum propemodum plus discriminis sit inter hominē fide illuminatum ac spiritualem, & hominem fide vacuum & carnalem, tamen in hac peregrinatione pii coguntur cum tam diversis animis in eadem urbe & in unis ædibus vivere. Sic Loth vivens Sodomis animo discruciabatur, optans eripi à nefariorum consuetudine. Sed turturem eundem quem modo audisti graviter suspirantē, Heu mihi quia incolatus meus prolongatus est; audi rursus exultantem spe promissæ felicitatis: Lætatus sum, inquit, in his quæ dicta sunt mihi, In domum domini ibimus. Ausculta & alium turturem insignem graviter ingemiscentem, patriæ cœlestis desiderio. Infelix ego homo, quis me liberabit de corpore mortis huius? Nunc & hunc ausculta exultantē. † Repletus sum consolatione, superabundo gaudio in omni afflictione nostra. Hos gemitus videmus semper fuisse gravissimos in viris ad cœlestem beatitudinem anhelan-

† 2. Cor. 7.

helantibus. Hinc olim tot hominum examina non ferentium idololatrarum impietatem ac sæviciam, occupaverūt solitudines Thebaidis. Hinc prima monachorum origo. Satiус esse ducebant cum leonibus ac pantheris habere commercium, quam cum hominibus impiis. Alii secesserunt in solitudines Syriæ, quorum est beatus Hieronymus. Alii in desertas insulas sese abdebant. Alii montium cacumina, pene inaccessa obsidebant, ut D. Benedictus. Nonnulli paludes horridas, & vix ulli animantium habitabiles scrutabantur, ut Patricius ac Bernardus. Alii rupes, & ipso aspectu horrenda quærebant loca, ut Bruno, aut si quis alius fuit auctor Cartusianæ sodalitatis. Hæc suffugia persuadebat piis hominibus huius exilii tædium. Studebant seiungi ab his qui habitabant Cedar. Sed hic quocunque te vertas, quocunque te abdas, in exilio es. Quære, pete quam voles retrusas latebras, homo ad homines vadis: atque ut universum hominum cōmercium effugias, hominem

minem tecum effers , mortale corpus tecum circumfers , quo gravatus sic ingemiscit Apostolus. Divus Basilii legitur monachos, qui in solitudinibus procul ab hominum commercio degebāt, ad urbana sodalicia revocasse, quod vir prudens intelligeret, illorum plerosque non evadere vere pios, sed superciliosos, falsa sanctimonix persuasione turgidos, irritabiles, vindices, morosos, sensus communis expertes, & ad omnem vitæ functionem ineptos. Fatetur idem D. Chrysostomus, experimento cognosci, si quando ab illis ieiuniis, vigiliis & chameuniis ad episcopi munus accerferentur. Foris quærebant, quod intus quærendum erat. Ponebant nidos, sed non in atriis domini, quum regnum Dei sit intra nos. Hic ipse sermonis cursus admonet nos ut ad nidos revertamur. Nidus est in quo acquiescit hominis desiderium, & in quo tranquille fovet pullos, hoc est, curas & cupiditates suas. Felix enim ille dicitur, qui quum sapiat, nihil præterea desiderat.

rat. Id nulli mortalium in hac vita potest contingere. Cæteris animalibus natura felicitatis terminos præscripsit, quæ simul ut ad id pervenerint, ad quod condita sunt, suam quandam beatitudinem assequeuta sunt. At hominis animus quoniam divinus est & immortalis, nihil invenit in hac vita in quo vere conquiescat, nisi fuerit assequutus ad quod conditus est. Quid est igitur illud ad quod conditus est homo? Ut corpore simul & animo cognoscat, amet, glorificetque deum conditorem & redemptorem ac dominum suum. Hæc est, inquit dominus, vita æterna, ut cognoscant te solum verum deum, & quem misisti Iesum Christum. Cognoscere, videre est, & videre frui est. Frui, beatitudinis extrema linea est. Hæc felicitas non continget plene nisi in resurrectione justorum. Hic tamen aliquis nidus est in atriis ecclesiæ, sed pensilis ac fixus in spe futurorum. Nam extra ecclesiam nulla est veræ felicitatis spes. Tam immensa, tam capax res  
est

est animus humanus, ut eum solus Deus possit explere, etiam si illi præter Deum sexcentos mundos addas. Quid quod etiam in rebus inanimis videas, unumquodque ad suam ferri sedem? Lapis ex alto deiectus, simul ut terram contigerit, quiescit: flamma quāto impetu fertur ad suum locum? Quid est hoc quod interdum sic concurrit terram, ut saxeos etiam montes disrumpat, nisi Boreas, nitens in nativum erumpere locum? Sic vesica vento distenta vi in aquam depressa exilit. Ignea res est animus hominis, qui quanquam gravatur hoc terreno corpusculo, tamen non conquiescit, donec ad nativam sedem subvolarit. Ac natura quidem omnes homines venantur ocium, quærunt aliquid in quo conquiescat animus, sed quoniam in rebus vel inanibus, vel perituris figunt nidum, quo magis expetunt quietem, hoc maioribus turbis involvuntur. Quid enim aliud sibi volunt tot veterum volumina de summo bono, de bonorum finibus, deque animi tranquillitate,

litate, quam Græci vocant *ἄσυχια*.  
 Alius posuit nidum in scientia, alius  
 in indolentia, alius in voluptate, qui-  
 dam in habitu virtutis, quem appel-  
 lant sapientiam. Nonnulli in actu us-  
 que virtutis. Sed isti omnes teste  
 Paulo evanuerunt in cogitationibus  
 suis, & quum lingua magnificis ver-  
 bis aliis *ἄσυχια* pollicerentur, ipsi  
 cor habebāt irrequietum. Quare ita?  
 Quoniam non exultaverunt in Deum  
 vivum. Si sic delirarunt sapientum  
 procures, quid attinet dicere de idio-  
 tis? Qui divitiis metiuntur felicitate-  
 tem. Atqui posteaquam ad præscri-  
 ptum sibi modum perveniunt, sen-  
 tiunt, esse verissimū quod scripsit il-  
 le Venusinus, Crescentem sequitur  
 cura pecuniam: Et, Crescit amor  
 nummi quantū ipsa pecunia crescit.  
 Alii contemptis opibus regnum am-  
 biunt ac monarchiam. Quid enim  
 aliud tanto rerum tumultu molieba-  
 tur Alexander Magnus? Sed quotam  
 ille mundi partem sibi potuit subige-  
 re? Et si totum subegisset, quum ex  
 Democrito didicisset, innumerabiles  
 esse



esse mundos, ingemuisset, qui in unius orbis parte tam diu laborasset. Quid non & fecit & passus est Iulius Cæsar, ut orbis Romani principatum teneret? Tenuit, sed ibi non conquievit animus. Imo curis & conscientia scelerum urgente, mente defectus est, ut vitæ tædio mortem optarit, sed inopinatam. Non potest illic esse vera quies, ubi est animus sibi male conscius. Finem nesciunt humanæ cupiditates. Hic sibi promittit ocium, si talem puellam nanciscatur uxorem, insigni forma, pulchreque dotatam: sed pro quiete molestiarum agmen reperit. Ille sibi beatam vitam pollicetur, si tale sacerdotium adipiscatur: sed assequuto crescit venandi. acrior sitis. Connectitur sacerdotium sacerdotio: eluctatum est ad Abbatis dignitatē, petitur episcopi mitra: & mitra, magis opima mitra permutatur. Iam animus anhelat ad Cardinalicium fastigium. Hoc ubi contigit, ambitur corona triplex. An hic tandem conquiescit animus? Respondeat nobis Iulius secundus: cuius  
extre-

extrema senectus intolerabilibus rerum fluctibus iactata est. De cæteris iudicent alii. Non est absurdum, quod Divus Augustinus interpreta-  
tur pullos, bona opera nostra, quæ nisi ponas in nido ecclesiæ catholicæ, frustranea sunt. Phocion & Aristides, Traianus & Antoninus, alique complures multa fortiter, iuste ac pie gesserunt erga patriam. Laudatur Zenonis continentia, Xenocratis integritas, Socratis patientia: sed quoniam extra Christum facta sunt, non contulerunt veram felicitatem. Iulianus imperator immensam pecuniæ vim effudit in subsidia pauperum. Sed adversus Christum. Idem in multis hæreticis quædam eximix virtutes vixque credibiles prædicantur. Magna divitiarum contemptio in Ebionitis, prodigiosa orandi assiduitas in Euchitis, magna abstinencia ac vitæ severitas in Manichæis. Sed hi frustra hæc omnia faciebant, quia non ponebant pullos suos in nido ecclesiæ, sed in suis quisque tabernaculis nidulati sunt: eoque convenit  
illis

illis illud veteris proverbii ; ut è malo corvo nasceretur malum ovum, & expectatis turturum pullis, excluderentur aspides. Nos igitur si quærimus veram animi quietem, perseveremus in tabernaculo domini virtutum, maneamus in unitate ecclesiæ catholicæ, quæ est Hierusalẽ, quæ ædificatur ut civitas, cuius participatio in id ipsum. Hęc est enim illa beata quies, de qua dicit alius Psalmus: In pace in id ipsum dormiã & requiescam. Quoniam tu Domine singulariter in spe constituisti me. Sion autem mons est Hierosolymæ, in quo tabernaculum erat & regia. Sion autem speculam sonat Hebræis. In hunc igitur montem ascendamus. Quomodo ascendemus? Contemptu rerum terrenarum ac desiderio vitæ cœlestis. Ibi post longas errorum ambages, post infrugiferas rerum humanarum curas delassati, inveniemus nidum in quo refocillemur, inveniemus requiem, quemadmodum dicit Psalmus 14; Domine quis habitabit in tabernaculo tuo? aut quis

quis requiescet in monte sancto tuo?  
 Ingrediamur sine macula hæreseos,  
 & proficientes in fide, quæ per dilectionem operatur: faciamus iusticiã,  
 non Iudaicam sed Euangelicam, totum quod recte videmur hodie agere Deo tribuentes. Ut autem in hunc montem subvolemus, simus animi demissione passeris, viles minimique precii in oculis nostris, non solliciti de crastino, sed omnem sollicitudinem proiicientes in eum, cui nostri cura est. Simus innocentia & castitate turtures: & intelligentes, nos non hic habere stabilem sedem, ad cœlestem illam Hierosolymam assidue suspiremus. Auscultemus voci Domini, ad veram animi quietem invitantis:  
 † Venite ad me omnes qui laboratis & onerati estis, & ego reficiam vos. Tollite iugum meum super vos, & discite à me, quod mitis sum & humilis corde: & invenietis requiem animabus vestris. Iuxta sensum humanum absurdus est sermo. Nam quæ requies mitibus & humilibus, qui

† Mat. 11.

qui conculcantur, & è sedibus suis exiguntur? Aut quæ requies ducen-  
tibus jugum? Servitutis nomen est iu-  
gum, & iuxta Græcorum proverbium,  
Servis nullum est ocium. Sed qui ad  
Christi exemplum mites sunt, terram  
possident: & qui iuxta mundum hu-  
miles sunt, in Christo sublimes sunt,  
pertingentes usque ad cœlum: & qui  
placido Christi iugo submittunt col-  
la, vere liberi sunt. Submittunt au-  
tem, qui citra disquisitionem fidunt  
illius promissis. Sequamur prophe-  
tam mystagogum, qui è vestibulo  
nobis ostēdit, quam amabilia, quam  
pulchra, quam suspicienda sunt atria  
domini, quanque placida sit in illis  
animatorum requies. Nunc ex atrio of-  
tēdit nobis altaria domini; quæ san-  
ctior & pulchrior templi pars est. Al-  
taria tua domine virtutum, Rex meus  
& Deus meus. Apud Iudæos magna  
erat templi ac vasorum tēpli religio,  
magnificus altarium ornatus. Hinc  
illæ voces, templum domini, tem-  
plum domini: & sanctissimum iusiur-  
randum erat, iurare per templum &  
altare.

altare. Nec fuit impune domino, dixisse, solvite templum hoc. Sed ista nihil aliud erant quam typi rerum spiritualium. Propheta dum hæc loquitur, aliud quoddam tabernaculum non manufactum cōtemplatur, alia videt altaria; quæ sic admiratur, ut attonitum verba deficiant. Quidam enim hunc sermonem, Altaria tua Domine, referunt ad superiora, Quam dilecta tabernacula, quam dilecta altaria! Augustinus annectit proximis, passer invenit sibi domum, turtur nidum; ut appositively sequatur, altaria tua; ut intelligamus, ipsa altaria esse nidos, in quibus conquiescimus. Mihi rectius videtur, ut sermo sit inabsolutus, quo magis exprimantur admirantis affectus. Sic quum videmus principis domū magnifice extructā, stupefacti dicimus, Palatium regium! Et quemadmodum hic emphasis est in voce regium, ita in prophetæ verbis magna emphasis est, in pronomine, tua. Tu unus es dominus virtutum, & hæc tua sunt altaria, te digna, tibi grata.

Rursus

Rursus pro virtutum, Græcis est *δυναμεις*. de quo prius admonuimus. Hebræis Sabaoth, hoc est, exercituum. Iteratio ad hoc fit, ut intelligamus, ecclesiam, licet iuxta mundum cōtemptam & inermem, tamen protectore deo exercituum invictam esse, atque ipsis etiam portis inferorum inexpugnabilem. Non hæc sunt altaria quæ vitulorum, hircorum & arietum sanguine cruentantur. Dominus iam olim per os Esaia hoc victimarum genus fastidiebat. Quid igitur? Deus spiritus est, & spiritualibus victimis delectatur. Non gaudet cæde pecudum, sed mortificatione cupiditatum spiritui reluctantium. Si amore Christi mactasti in te ipso pecuniæ studium, & quod prius abditum pro Deo colebas, nunc erogas in membra Christi, gratissimam Deo victimam immolasti. Si iugulasti luxum & libidinem è lurcone factus sobrius, ex incontinente castus, acceptam Deo hostiam mactasti. Si læsus à proximo, in gratiam Christi compescis effervescentem animum,

ac

ac vindictam remittis, gratissimum deo sacrificium obtulisti. Si fide firmus & charitate fervens tua omnia reque totum tradis voluntati divine, paratus & mortem & gehennam subire, si sic illi visum fuerit, gratum holocaustoma posuisti domino virtutum. Hic est cultus rationalis sive spiritualis, & hostia viva, sancta ac deo placens, ad quam cum obsecratione nos hortatur apostolus Rom. 12. Ita deus non delectatur vapore thuris, aut myrrhæ, aut storacis, sed amat suffitum spiritualem, vota ac preces piarum mentium, gratiarum actionem, & sacrificium laudis, quo deus gaudet honorificari. Per has victimas iter est ad videndum salutare dei. Qui finis est & huius Psalmi: Videbitur deus deorum in Sion. Preces acceptæ sunt, quæ fiunt cum fide: & in nomine Christi gratiarum actio, non tantum in prosperis, verum etiam in adversis immolanda est. Sacrificium laudis ita gratum erit, si iuxta Pauli doctrinam, quicquid facimus sive in verbo sive in opere, non

D in .



in gloriam nostram, sed in gloriam Dei faciamus. Hæc oblatio vere munda, quia spiritualis, per univ-  
 sum orbem iugiter offertur in altari-  
 bus ecclesiæ. In hoc nido tuti con-  
 quiescimus ad tempus, quia altaria  
 non sunt hominum, sed domini vir-  
 tutum: cuius voluntati nemo potest  
 resistere: qui per simplices & humiles  
 coli voluit, qui pusillis impertire vo-  
 luit dona regni cœlestis. Quo nomi-  
 ne & ipso patri gratias agit in Evan-  
 gelio: \* Abscondisti hæc à sapientibus  
 & prudentibus, & revelasti ea par-  
 vulis. Ita, pater, quoniam sic placitum  
 fuit ante te. Non est quod metuas  
 mundum aut Satanam, si te recipit  
 in tabernacula sua dominus virtut-  
 um. Ille tuetur quod instituit, ille  
 regit ambulans in medio suorum, ille  
 cōsummat quod fecit: Dominus vir-  
 tutum tuetur, rex gubernat, deus  
 evahit ad regna cœlorum. Rex meus  
 & deus meus. Similiter loquitur  
 Psal. 43. Tu es ipse rex meus & Deus  
 meus. Hoc proprie potest ad Chri-  
 stum

\* *Mat. II.*

stum ecclesiæ principem accommo-  
dari. qui Psalmo 2 loquitur: Ego au-  
tem constitutus sum rex ab eo, su-  
per Sion montem sanctum eius. Sub  
ditione dei sunt universa. Et dæ-  
mones agnoscunt omnipotentem, &  
contremiscunt, sed fidei vox hæc est  
peculiaris; Rex meus est deus meus.  
Nemo potest dicere dominum Ie-  
sum, nisi in spiritu sancto. Passim ta-  
men audivimus voces appellantium  
dominum Iesum. Sic nemo potest  
dicere: Rex meus & deus meus, nisi  
qui se plena fiducia dei voluntati  
permisit, & ab hoc uno præmium æ-  
ternæ felicitatis expectat. Alius Psal-  
mus populum illum beatum pro-  
nunciat, cui dominus est deus.  
Item quum aliis aliquot scripturæ  
locis, tum Levitici 26. ita loquitur  
dominus. Ponam tabernaculum  
meum in medio vestri, & non abii-  
ciet vos anima mea. Ambulabo inter  
vos & ero deus vester, vosque eriti-  
is populus meus. Quem hic regem  
appellat, post appellat legislatorem.  
Itaque si regem agnoscimus, paream-

mus illius legibus. Si deum agnoscimus, nihil supra eum diligamus, imo nihil omnino diligamus quod non propter ipsum diligamus. Nominis regis & illud admonemur, quod sanguine Christi redempti sumus à tyrannide diaboli, & pro turpissimo simul & crudelissimo domino venimus in ius clementissimi regis. Haftenus mystagogus sive hierophanta noster, ostendit nobis amabile domini tabernaculum, introduxit in atrium, monstravit altaria, & hostias spirituales. Nunc ostendit nobis eximios illos ac deo dignos sacerdotes, sacris operantes in templo domini. Beati, inquit, qui habitant in domo tua, domine, in secula seculorum laudabunt te. Qui fortes sunt in fide, qui radicati in charitate, iam habitant, non in atriis, sed in domo domini. Nam habitare stabilitatis verbum est, Et quare sunt beati? Num quod abundant opibus, aut præfulgeant honoribus, aut affluant deliciis? Nequaquam. Quam ob rem igitur? Quoniam, inquit, In secula

secula seculorum laudabunt te. Ecce tranquillam domum, quam repperit sibi passer: ecce quietum nidum, quem repperit sibi turtur. Hic est enim supremus finis, ad quem conditus est homo, ut agnoscat, amet, & hymnis celebret conditorem, redemptorem, gubernatorem ac remuneratorem suum. Iuxta sensum humanum qui laudantur potius beati videntur quam qui laudant. At in rebus divinis, secus est. Deus enim nullius laudibus fit felicior. Est enim æternus fons omnis gloriæ. Sed quicunque illum laudant, hoc ipso beati sunt quod laudant. At non omnes illum laudant qui cāunt, \*Gloria tibi domine, sed in quorum cordibus habitat charitas, quod est vinculū perfectionis, & exultat pax Christi, ad quam vocati sunt, qui in unum corpus coaluerunt, seseque mutuo cohortantur in psalmis & hymnis & canticis spiritualibus, in gratia, cantes in cordibus suis deo. Quod si voce corporea laudandus est deus,

Psallamus spiritu, psallamus & mente. Non est speciosa laus in ore peccatoris, non est grata deo symphonia, ubi vocibus concordibus dissonant animi: denique extra domum dei, quæ est ecclesia, non est hymnus acceptus deo. Si volumus esse beati, sic unanimes laudemus deum, quemadmodum laudant angeli, inter quos nulla est dissensio. Universa creatura suo quæque more laudat dominum. Neque enim cœli tantum enarrant gloriam dei, sed omne animantium genus: ipsa elementa & quicquid ex his gignitur, dum ipso aspectu conditoris omnipotentiam, sapientiam ac bonitatem nobis declarant, clamitant laudes dei. Eoque in Psalmis, & in Cantico triumphatorum, non tantum sol & luna, sed & pecudes & pisces, & montes & colles, & maria & flumina, invitantur ad laudandum nomen domini. Soli spiritus impii, & homines mali non invitantur ad hanc symphoniam, quia per hos, quod quidem in ipsis est, blasphemia potius afficitur

tur

tur nomen domini. Sed quid sibi vult quod addit propheta, In secula seculorum laudabunt te? Quo loco subiicitur, Sela. Quod Hieronymus vertit semper. Tametsi sunt qui negent eam vocem æternitatis habere significationem, quod in scripturis nusquam reperiatur præterquam in Psalmis, & interdum his locis ubi nulla sit æternitatis significatio. Proinde existimant idem pollere Sela quod diapalma; quod indicium erat mutandæ melodix. Nam Psalmi vocibus ac musicis organis canebantur. Habent autem & hodie musici signa quædam quibus admonentur, mutandum esse cantionis rationem. Neque enim omnis harmonia cuius sententiæ congruit. Sic & in comædiarum deverbis tibi modos quosdam accinebant, aut fortasse præcinebant, ex quibus populus intelligebat sententiæ genus, gravis esset an secus. In hoc certe Psalmo ab hac clausula videtur esse alterius argumenti exordium. Sed hoc utcumque habet, certe verba In secula seculorum

rum, declarant æternitatem, ut non possint quadrare in templum quod erat Hierosolymis. Id enim non ita multo duravit ultra ducentos annos. Quanquam Iudæorum vulgus sibi persuaferat legem & illius templi religionē usque ad mundi finem duraturam. Quemadmodum Romani sibi persuaferant, Capitolium fore sempiternum, quum hodie Romæ ne vestigium quidem Capitoli pos-  
sint ostendere, nec Iudæi templi sui Hierosolymis. Aliud igitur templum videbat oculus propheticus in quo sine fine laudaretur nomen domini. Ea nimirum est ecclesia catholica. Sed qui possit esse perpetua laudatio, quum mortales sint qui laudant. Hęc ecclesia laudatrix domini, consumptionem expectat, finem nescit. Et sicut in piis charitas nunquam excidit, ita laudatio Dei, hic exercetur, in cœlis perficitur. Simul ut animus evolarit ex hoc terreno domicilio, iam cum angelis ac beatis animabus limpidius canit laudes Deo, donec recepto corpore non iam animali sed  
spi-

spirituali totus homo sine fine citra-  
que interruptionem resonabit con-  
ditoris sui laudes. Est enim una ea-  
demque domus ecclesia militans in  
terris, & ecclesia triumphans in cœ-  
lis, nisi quod illa pars est purgatio-  
r. Quemadmodum idem est aer terræ  
quam calcamus proximus, & qui iux-  
ta quosdam philosophos, lambit  
convexa orbis lunæ, sed hic ob ter-  
ræ contagium crassior, ille purior.  
Nihil autem obstat, quo minus u-  
nusquisque nostrum licet gravatus  
hoc mortali corpore, tamen sine in-  
termissione laudet deum suum. Qui  
potest, inquis? Potest, si quicquid  
cogitamus, loquimur, aut agimus,  
omnia in gloriam Dei faciamus: et-  
iam quum edimus ac bibimus, etiam  
quum dormimus, aut lusu corpuscu-  
lum reficimus, laudamus Deum no-  
strum. Glorificate, inquit † Aposto-  
lus, & portate dominum in corpore  
vestro. Non omnia membra loquun-  
tur, sed omnia membra corporis no-  
stri glorificant Deum, si servant iu-

D 5                      stitia,

† 1. Cor. 6.



sticiæ, etiam si lingua fileat. Postea-  
 quam propheta velut ecstasi raptus  
 pervenerat ad illam cœlestem Hie-  
 rosolymam, in qua nulla est mole-  
 stia quæ interpellet, nulla animorum  
 dissensio quæ vitiet melodiam, nul-  
 la necessitas, quæ interrumpat hy-  
 mnos dei: quod ait beatus Paulus, si-  
 ve excidimus, deo, siue sobrii su-  
 mus, vobis: velut ad se rediens, me-  
 minit se hominem esse, & in hoc exi-  
 lio versantibus ostendit viam qua ad  
 illam beatam tranquillitatem perve-  
 niatur. Dixerat: Beati qui habitant  
 in domo tua, domine: etiam angelos  
 & pias animas cum angelis viventes  
 complectens. Hic mutata iam har-  
 moniæ specie dicit: Beatus vir, siue,  
 ut ex Hebræo vertit Hieronymus,  
 Beatus homo. Viri nomen non ex-  
 cludit fœminas. In Christo non est  
 vir aut fœmina, non servus aut liber,  
 sed nova creatura. Hominis vocabu-  
 lum admonet nos fragilitatis nostræ,  
 cui nisi Dei misericordia porrigat  
 manum, ne ad ecclesiæ quidem a-  
 trium potest accedere, tantum ab-  
 est

est ut ad illam supernam beatorum sedem possit evolare. Aditus in ecclesiam fides est, sine qua nihil prodest baptismus. At fidem nemo sibi largitur; dei donum est, quo deus quos vult prævenit, & ad Christum trahit. Nam homo, quatenus est homo, carnalis est, & nihil nisi mūdum sapit. Hoc perspicuus propheta, submissioribus iam modis ait, Beatus homo cuius est auxilium abs te: sive, ut legit D. Augustinus, assumptio. Græce est ἀντίληψις. quæ vox convenit in eum qui manum porrigit conanti ascendere. Nam & ecclesia civitas est in edito sita, quemadmodum templum Hierosolymitanum erat in monte Sion. Hieronymus pro auxilio vertit fortitudinem. Voces dissonant: sensus idem est. Nitentibus ad ardua, viribus opus est. Homo autem ex sese nihil potest. Fides autem proprie robur addit homini, ut iam nec mundum nec satanam metuat. Itaque qui totam fiduciam in Deo collocant, ii demum confirmati vigore spiritus valent conscendere

in montem domini. Ad templum illud Iudaicum, quod extruxit Solomon, quindecim gradibus ascendebatur. In primo gradu propheta queritur de improbitate linguarum, radioque exilii. In secundo confirmatur dono fidei, dicens: Levavi oculos meos in montes, unde veniet auxilium. Auxiliū meum à domino, qui fecit cœlum & terram. Fides est quæ stabilit gressus nostros, ne vacillent. Ita Paulus *a* Corinthiis: Fide statis. Itē *b* Rom. Tu autem fide stas. Et beatus *c* Petrus hortatur, ut resistamus diabolo fortes fide. Is enim demum vere fortis est, qui in se imbecillis fortitudinem suam habet in deo. Quod indicās Esaias, ait, *d* fore, ut hoc canticum canatur in terra Iuda. Canticum est Evangelicæ professionis. Iuda enim Hebræis confidentem sonat. Quod igitur canticum? Urbs fortitudinis nostræ Sion. Sion ecclesia est: sed unde fortitudo imbelli? Servator ponetur in ea murus & antemurale. Audis inexpugnabile

*a* 2. Cor. 1. *b* Rom. 11. *c* 1. Pet. 5. *d* Esa. 30.

bile munimentum. Idem ait, In silentio ac spe, erit fortitudo vestra. Tacitus expectat qui nihil diffidit de promissis. & spes tantæ felicitatis quæ non pudefacit, quia non fallit, etiam in mediis afflictionibus ac mortibus exhilarat animum. In hac igitur vita non est perfecta beatitudo, & tamen magna quædam beatitudinis pars est, dum reputamus animo, quam sit momentaneum totum huius vitæ spatium, & quam non sint condignæ afflictiones ad futuram gloriam quæ revelabitur in nobis. Ad hæc, quam bonæ certæque fidei sit qui nobis eam promisit:† Ut enim nos illum abnegemus: ille fidelis permanet, se ipsum abnegare non potest: tantum ut perseveremus in fide & charitate, continentes nos ipsos intra septa domus Dei, in qua succrescentes usque ad mensuram plenitudinis Christi, per quindecim mysticos gradus ascendamus in æternum tabernaculum, & per quadraginta mansiones ad terram illam quietis,

† 2. *Tim.* 2.

quietis, quam dominus in Euangelio promisit mitibus, alacriter proficiſcamur. In arduo eſt quod petimus, egregium eſt quo tēdimus. Nemo repente ab imo ad ſumma provehitur. Opus eſt qui commonſtret viam, quemadmodum Deus Iſraelitis, qui noſtri typum gerebant, dux fuit per invia deſertorum: opus eſt qui è ſublimi porrigat manum, & nitentem ſuſum trahat. Horum nihil ipſi nobis præſtare poſſumus. Dominus eſt, qui & velle & perficere operatur in nobis. Ille per fidem aperit nobis oculos, ut videamus ubi ſumus, ut horreamus quod ſumus, & ſuſpiremus ad ea quæ nondum ſumus. Primum igitur auxilium à domino, hoc eſt, primus beatitudinis gradus eſt, ut levemus oculos in montes. E cœlo datur, ut amemus cœleſtia, & contemnamus terrena. Qui circūſpectant ſuam ſapientiam, ſuas vires, ſua merita, qui tantum reſpiciunt ad ceremonias, condonationes ac diplomata pontificum; nunquam perveniunt ad illam beatitudinem. Quid igitur  
facit

facit ille beatitudinis candidatus, cui dominus per fidem dedit, ut fastiditis humilibus mundi curis, oculos attollat in mōtes æternitatis? Ἀναβάσεις, ascensiones sive gradus ascensorios disponit in corde suo. Quas hic appellat ἀναβάσεις, in canticis graduum appellat ἀναβαθμύς. qui gradus sunt, sed ascendentium. quum Latinis iisdem gradibus descendatur quibus ascenditur, Cæterum in negotio pietatis non oportet unquam retrocedere, sed oblitos à tergo relictorum semper ad perfectiora tendere. Respexit Eurydice, & relapsa est in Orcum. Respexit uxor Loth, & versa est in petram salis. Habet autem & pietas gradus suos, quemadmodum hominis ætas. Catechumeni parturiuntur, modo baptizati velut infantes aluntur lacte, adultis pro solido cibo proferuntur retrusiora mysteria. Et Paulus sapientiam loquitur inter perfectos: inter infirmos profitetur se nihil scire, nisi Iesum Christum, & hunc crucifixum. Ergo qui sustulit oculos suos in montes, disponit gradus

dus ascensorios. Ubi? In corde suo.  
 Nec mirum. ad illum enim montem  
 non ascenditur pedibus, sed affecti-  
 bus. Sunt externi gradus, quos ut  
 non oporteat reprehendi, tamen inu-  
 tiles sunt, nisi gradus disponantur in  
 corde. E laico fit clericus, è clerico fit  
 hypodiaconus, ex hypodiacono dia-  
 conus, è diacono atchidiaconus,  
 ex hoc presbyter, è presbytero epi-  
 scopus. Rursus è laico monachus, è  
 canonico regulari Dominicanus, è  
 Dominicano Franciscanus, è Fran-  
 ciscano Benedictinus, è Benedictino  
 Cartusianus. Quanquam de his gra-  
 dibus multa inter ipsos controversia  
 est, qui gradus hos disponunt ac di-  
 gerunt iuxta res externas. Sunt qui  
 putant, Franciscanos in altiore gradu  
 consistere, quod seminudis incedant  
 pedibus, quod pecunias non contin-  
 gant. Rursus sunt qui his præferant  
 Dominicanos, quod domi non ve-  
 scantur carnibus. Utrisque præfe-  
 runt Benedictinos, qui & pluribus  
 horis canunt in templis, nec un-  
 quâ domo prodeunt. Iam inter omnes  
 sum-

summum gradum obtinent, qui lorica  
 ferrea pro indusio cutem defri-  
 cant. Hi gradus ita demum profunt  
 ad pietatem, si domino auxiliante ve-  
 ri gradus disponantur in corde. De-  
 siisti raptò vivere, nonnullus ad pie-  
 tatem gradus est. Non solum restituis  
 fraude parta, verumetiam tua pro-  
 fundis in egenos amore Christi: Al-  
 tiorem ascendisti gradum. E violen-  
 to ac feroce factus es innocens: Ali-  
 quem ascendisti gradum in corde.  
 Studes omnibus benefacere: in sub-  
 limiorem gradum te recepisti. Tan-  
 dem & illis à quibus graviter læsus es,  
 non modo remittis vindictam ex a-  
 nimo, sed in Christi gratiam bene-  
 velle & benefacere gaudes: ad vere-  
 sublimen gradum emerdisti. Hæc ex-  
 emplī causa proposui, de cæteris item  
 quisque apud sese consideret. Hi gra-  
 dus digeruntur in corde hominis, in  
 intimis animi recessibus. Hos igitur  
 gradus quibus ad perfectionem ten-  
 dimus, beatus ille disponebat in cor-  
 de suo, non se iactans apud homines,  
 sed se probans inspectori cordium,  
 sed .



sed auxilium non aliunde expectans quam à domino. Atque hæc meditatur in valle lachrymarum. Quid enim aliud est totus hic mundus, nisi convallis obscura, nascentium, parturientium, morientium, ægrotantium, egentium, navigantium, belligerantium, aliisque mille lachrymarum occasionibus plena: à quibus nec potentes nec divites, nec reges ulli sunt immunes. Hæc est illa vallis Achor, id est, tumultus ac perturbationis, in quam præcipitatus est Achan, ut habetur Iosue 7. In hoc loco nos posuit dominus, posteaquam è paradiso per inobedientiam excidimus, ut aliquantisper in exilio degentes, per obedientiam fidei, & observationem præceptorum dei, moliremur reditum in patriam. Nec est quod nos huius vallis pigeat: in hanc descendere dignatus est ipse Dei filius, ut nobis esset via, veritas & vita. Ergo quandiu vivimus in hoc corpore mortali, versamur in valle lachrymarum. Sed dixerit aliquis: Frustra igitur homo disponit gradus ascen-

ascensorios in corde suo, si permanendum est in valle lachrymarum. Sed hæc vallis Achor vertitur in requiem armentorum, iuxta Esaïam 65. Daturque Hierusalem ad declarationem spei, Oseæ 2. Præter hæc oportet meminisse, quod in arcem Sion affectibus ascenditur, non pedibus, corde ascenditur, non scalis. Corpus hæret in valle, animus eluctatur in montem. Ita visum est regi nostro, ut per temporarias afflictiones huius mundi, pertingamus ad coronam immortalitatis. Nec videatur huius militiæ dura lex. Rex noster qui nobis hanc legem præscripsit, ipse eam in se præstitit. Nec est quod despondeamus animum, qui nos ad certamen vocat: ipse dabit benedictionem, auxilians nobis in periculis, consolans in afflictionibus, ut possimus sustinere. Agonotheta noster evocat suos ad certamen: proposuit ingentia præmia, qui legitime certaverint: præsidet, non tantum ut spectator ac iudex, verum etiam ut auxiliator. Ille suppeditat vires, suggerit

gerit alacritatem. Nam hic benedictio non est laudis vox, sed liberalitatis, quemadmodum loquitur Apostolus: Qui parce seminat, parce & metet. Qui seminat in benedictionibus, de benedictionibus metet vitam æternam. Aspera lex est, qui non tollit crucem suam quotidie, & sequitur me, non potest meus esse discipulus. Qui non odit patrem & matrem, præterea & animam suam, non est me dignus, &c. Dura inquam & horrenda lex est, nisi accedat gratiæ largitas: quam ut ostenderet & gratuitam & minime parcam esse, maluit *ἰσχυρία* appellare quam alio nomine. Sub lege Mosaica parcior erat gratiæ dispensatio: verum simul ut effulset humanitas ac benignitas dei nostri, qui non ex operibus iustitiæ, quæ fecimus nos, sed secundum misericordiam suam salvos nos fecit per lavachrum regenerationis & renovationis, spiritum suum abunde effundit in universam carnem. Apud homines aliud interdum est benedicere, aliud benefacere: imo frequenter

quenter hominis benedictio maleficium est, non beneficium : sed deo idem est benedicere & benefacere. Religiose faciunt qui procumbunt & accipiunt episcopi benedictionem: sed quanto iustius est, nos prosterni coram deo , ut illius impetremus benedictionem? Vide porro quantum efficiat dei benedictio: Ibunt, inquit, de virtute in virtutem, & videbitur deus deorum in Sion. Mirabitur hic aliquis, subito mutatū verbi numerum. Modo dixit: Beatus est cuius auxilium abs te, & disposuit in corde suo. Hic ibunt de virtute in virtutem. Unde repente ex uno plures facti sunt? In mysticis literis, dei benedictio affert fœcunditatem, sicut maledictio sterilitatem. Maledicta terra in opere tuo: quum exercueris eam, spinas & tribolos producet tibi. Contra quum deus creasset hominem ex uda argilla, uxorem ex una costâ lævi lateris, benedixit eis, dicens: Crescite, & multiplicamini, & replete terram. Item Psal. 106. Benedixit eis, & multiplicati sunt nimis.

Atque

Atque ista quidem typi sunt rerum  
 spiritualium. Itaque posteaquam per  
 Evangelii gratiam exempti sumus à  
 maledictio legis, ac per spiritum san-  
 ctum effusa est in Apostolos benedi-  
 ctio, quanta celeritate veri dei cul-  
 tus, qui prius apud Iudæos velut in  
 orbis angulo coercebatur, sese diffu-  
 dit per universas mundi nationes?  
 Quot virginum, quot martyrum,  
 quot sessorum examina profilierunt?  
 Unde hæc prodigiosa fœcunditas?  
 Unde nisi ex benedictione dei? Filii,  
 inquit †, tui de longe venient, & filia  
 tuæ de latere surgent. Itaque deserta  
 illa & vidua mulier, admiratur inspe-  
 ratam fœcunditatē suam, dicens, Et  
 isti filii unde venerunt? Venerunt ex  
 omni natione quæ sub cœlo est, ab  
 Indis, ab Gadibus, à Thracibus, à  
 Gotthis, à Scotis & Hybernis. Ita-  
 que iam multiplicati benedictione  
 dei, & animosi fide, alacres spe, i-  
 bunt de virtute in virtutem. Ne hic  
 quidem est ἀπερὶ, sed ἐν δυνάμει τοῦ  
 θεοῦ, quod Hieronymus ex Hebræo  
 vertit:

† *Esa.* 60.

vertit: de fortitudine in fortitudinē. Nonnulla fortitudo est, pro Christo negligere voluptates, opes & honores huius mundi: sed fortius est, vincere pietatis affectus in parentes, uxorem ac liberos: longe vero fortissimum est, mortem & morte graviora tormenta vitæ cœlestis amore negligere. Qui gradibus nituntur in altum, quo magis ascendunt, hoc magis lassescunt: at qui per hos gradus ascendunt, quo longius eunt, hoc redduntur fortiores & alacriores. Unde tandem? Nisi quia res non est humanarum virium, sed benedictionis divinæ. Alioqui unde tam præfens animi robur, tanta alacritas apostolorum, juvenum, virginum? in squalore carcerum? in flagris & aculeis? in ipsis etiam mortibus? ad quarum etiam commemorationem humanus inhorrescit animus? Non aliunde, nisi quod agonothetes ac legislator pro magnitudine tentationum augeat benedictionem. Mirantur homines qui foris vident afflictionem, sed non vident internam benedictionem

dictionem. Non ineleganter à viro  
 quodam ob pietatem celebri dictum  
 est de monachis austeram vitam a-  
 gentibus : Multi vident cruces no-  
 stras, sed non vident unctiones no-  
 stras : Vident corpus attenuatum vi-  
 giliis, ieiuniis ac laboribus : vident  
 solitudinem, omniumque volupta-  
 rum abstinentiam : & tamen, in cor-  
 pusculo exiguo & imbecilli non vi-  
 dent quantis deliciis reficiatur ani-  
 mus ad cœlum anhelans. Sed quod  
 tandem præmium petitur tantis la-  
 boribus ? Videbitur, inquit, deus  
 deorum in Sion : sive, ut vertit Hie-  
 ronymus, apparebunt apud Deum  
 deorum in Sion. Hoc, est brabeum  
 omnium certaminum, hæc, est re-  
 requies omnium votorum, hæc,  
 felicitatis summa : Domine, inquit,  
 ostende nobis faciem tuam, & salvi  
 erimus. Et Philippus : Ostende nobis  
 Patrem, & sufficit nobis. Atqui Deum  
 nemo vidit unquam. Invisibilis est o-  
 culis corporis, sed cordi mundo vi-  
 sibilis est. Itaque dominus in Evan-  
 gelio beatos pronunciat, qui sunt  
 mundo

mundo corde, quoniam ipsi Deum videbunt. Cor autem intellige non intestinum corporis, spirituum ac sanguinis fontem, sed mentem hominis fidei illustratam lumine. Videtur autem interdum & in hac vita, purgatis mentibus, sed per speculum & in ænigmate, sed non nisi in Sion. Nam extra ecclesiam nemo videt Deum, quia nemo habet puram mentem. Et si sibi videntur videre, hallucinantur iam, spectrum videntes pro Deo. Non vulgaris autem beatitudo est, apparere apud Deum deorum. Quid est parere apud illum? Cum plena fiducia venire in cōspectum illius, qui novit omnes latebras humani cordis. Hoc non ausit nisi pura & unde quaque sincera conscientia. Alioqui videbitur & impiis Deus, sed horribilis erit aspectus illius, qui piis est amabilis. Non est alius Deus, sed diversi sunt oculi. Ut agris oculis molesta lux est, quæ sanis est iucunda. Omnes enim sistendi sumus ante tribunal summi iudicis, à quo non est provocatio. Miles qui fidelem &

E                      strenuam



strenuam operam navavit in bello, servus qui gnaviter dispensavit talenta domini, gaudens prodit in conspectum ducis & heri sui, auditurus, Accipe coronam vitæ æternæ, & intra in gaudium domini tui. Ille beatus est, qui non veretur suam conscientiam aperire domino, dicēs † cum Ezechia rege: Obsecro, domine, memento quæso, quoniam ambulaverim coram te in veritate & corde perfecto, & quod bonum est in oculis tuis fecerim. Simili fiducia fortissimus ille Christi miles prodit in conspectum imperatoris sui: Ecce, inquit, coram Deo in Christo loquimur. Et ad eosdem Corinthios de se loquens: Non ambulantes in astutia, neque adulatorantes verbum Dei, sed in manifestatione veritatis commendantes nosmet ipsos ad omnem conscientiam hominum, coram Deo. Idem alibi, Bonum certamen certavi, cursum consummavi, fidem servavi: de cætero reposita est mihi corona iusticiæ. An non magna felicitas est, sic posse

† *Esa.* 38.

posse comparere apud Deum deorum in Sion, in specula perfectionis Euangelicæ? Deum deorum dixit, iudicem omnium indicans. Sive enim accipias populi iudices, sive pios homines ad quos sermo dei factus est, sive angelos qui & ipsi dicuntur Eloim, sive dæmones aut dæmonum ministros homines, qui se pro diiscoli passi sunt, hic unus est Deus deorum, iudex universorum; sicut testatur Psalmus 81; Deus stetit in synagoga deorum. in medio autem deos diiudicat, ipse à nemine iudicandus. Nec angelorum, nec prophetarum, nec ullius sanctorum aspectus confert homini veram beatitudinem. Solus hoc præstat deus deorum. Huc ut pertingamus, dominus impertit benedictionem, sed orantibus. Assidue rogari vult, non ut admoneatur, sed ut nos rogando digni efficiamur, quibus largius impertiat suam benedictionem. Nam & hoc pacto paremus apud Deum, quoties vel appellamus illum puris precibus, vel pro beneficiis acceptis gra-

tias agimus. Domine deus virtutum, exaudi orationem meam, auribus percipe, deus Iacob. Angelorum deus est, eoque deus virtutum dicitur, & hominum deus est, qui patriarcham Iacob imitantur. Is luctando cum angelo meruit benedictionem. & idem dixit: Vidi dominum facie ad faciem, & salva facta est anima mea. Sequitur: Protector noster aspice Deus, & respice in faciem Christi tui. Nondum plenam securitatem assequutus est, qui requirit protectorem. Adhuc metuit ignea iacula malorum spirituum è sublimi nos impetentium. Adversus hæc implorat deum exercituum, ut suis sit clypeus. Hoc enim vertit Hieronymus, quod septuaginta verterunt hyperaspisten. Magna est dæmonum potentia, sed dominus virtutum unus potentior est universis. Si ille dignatur nobis esse clypeus, non est quod metuamus ulla iacula. Sub hoc clypeo tutus latebat qui dicit: \* Dominus protector vitæ meæ; à quo trepidabo? Et alibi rursus:

\* *Psal.* 26.

DE ECCLES. CONCORD. IOI  
 runsus: † Domine, ut scuto bonæ vo-  
 luntatis tuæ cinxisti nos. Nullum est  
 hominis scutum, quod totum homi-  
 nis corpus reddat invulnerabile, quin  
 & ipsum scutum interdum prodit ho-  
 minem: at quem tegit Dei clypeus,  
 nulla ex parte potest sauciari. Aspici  
 à Deo, tegi est. Aspicit autem, cui  
 propicius est ac bene vult. Eoque  
 Psalmus quem modo citavi, scutum  
 appellat benevolentiae, Græce *ἡ ἀσπίς*.  
 Hieronymus vertit placabilitatem.  
 Qui suis meritis sese protegent, &  
 his veluti clypeo fidunt, an tuti sint,  
 ipsi viderint. Qui fiduciam suam col-  
 locaut in ceremoniis, in cultu divo-  
 rum, in veste, quasi tutum reddat ab  
 insultu Satanæ, non satis fidei utun-  
 tur clypeo. Sed gratiæ Dei & huius  
 promissis tuto fiditur. Aspicere Deū,  
 beatitudo est, sed illum non possu-  
 mus aspicere nisi prius aspexerit nos.  
 Cum essemus cæci & in tenebris plus-  
 quam cimmeriis versaremur, ille di-  
 gnatus est aspicere nos, aperuit ocu-  
 los nostros, & quum essemus inimici;

E 3

dili-

† *Psal. 5.*

diligendo nos effecit, ut ipsum redamaremus. Respice in faciem Christi tui. Non arbitror anxie disquirendum, utrum hoc ad personam Davidis, an alterius cuiuspiam iuxta communem sensum referatur. Christus Græcis unctum sonat, quod Hebræis Messias. Omnes Christi sunt, qui in Christum renati sunt. Ab horum facie nunquam avertit oculos Deus, sed custodit illos ut pupillam oculi, modo ne ipsi faciem suam avertant ab eo. Regum autem ac sacerdotum est ungi. Utrunque suo quodam modo sunt, qui suo cognomini respondēt, quos beatus Petrus† alloquitur: Vos autem genus electum, regale sacerdotium, gens sancta, &c. Sed ille Christorum omnium princeps est, qui dictus est princeps pacis, ac sacerdos in æternum secundum ordinem Melchisedec, quem singulariter unxit Deus oleo lætitiæ præ participibus suis In huius faciem, quoniam caret omni nævo, deus pater gaudet aspicere, quem profitetur esse filium

unice

† 1. Pet. 2.

DE ECCLES. CONCORD. 103  
unice dilectum, in quo sibi placitum  
sit. Quid sibi vult igitur, quod ait  
propheta, Aspice, & respice in faciem  
Christi tui? Quicquid Deus largitur  
nobis, per filium ac propter filium  
largitur, non propter opera iusticię,  
quę fecimus nos. Nos enim in mul-  
tis offendimus omnes. Solus ille a-  
gnus est omnis expers maculę. Ergo,  
protector noster deus, si tuos oculos  
offendit facies, hoc est, conscientia  
nostra, respice in faciem Christi filii  
tui, quem sine exceptione diligis: per  
illius merita nobis largire, quod ipsi  
non meremur. Iudæi quoniam non  
noverant incarnationis mysterium,  
in precationibus suis, diffidentibus  
suis meritis obtestabantur deum per  
memoriam patriarcharum, Abra-  
ham, Isaac & Iacob, quorum pietas  
Deo fuisset accepta. At Christiani ni-  
hil petunt à patre, nisi per Iesum Chri-  
stum, quem habemus in cœlis advo-  
catum efficacem, qui que suam fidem  
nobis obstrinxit, fore ut accipere-  
mus quicquid postularem patrem  
in ipsius nomine. Qui scripsit hunc

Psalmum, non viderat Christum in carne, sed oculis fidei, qui longe prospiciunt, viderat illum venturum: quemadmodum & Abraham tot seculis Christi adventu antiquior viderat diem illius, & gavisus est. Nos igitur quoties aliquid à deo petimus, cum fiducia petamus, sed eam fiduciam hauriamus, non ex nostris benefactis, sed ex gratuitis Christi promissis. Ne dicamus, respice ad ieiunia mea, aut eleemosynas, aut vigiliis, aut chameunias: Sed respice in faciem Christi tui. Docet hoc Paulus Ephes. 3. In Christo Iesu domino nostro habemus fiduciã ac accessum, in confidentia per fidem eius. Quid est per fidem eius? Quia fidendum est illi toto pectore, qui non fallit in promissis, etiam si promittat quæ videntur nobis impossibilia. Quis enim credidisset fieri posse, ut divina humanaq; natura sic unirentur ut coirent in unam personam? At ille promisit & præstitit. Quis crederet fieri posse, ut homo verus sederet ad dextram Dei Patris? Promisit & præstitit.

DE ECCLES. CONCORD. 105  
stitit. Quid est igitur quod non spe-  
remus à deo , modo respiciat in fa-  
ciem Christi sui? Ut autem intelligas,  
hanc interpretationem non esse so-  
mnium sensus mei , sed prophetam  
agnoscentem dignitatem suam con-  
fugisse ad faciem Christi , attende  
quod sequitur : Quia melior est dies  
unus in atriis tuis, super millia. Nihil  
vetat quo minus hæc iuxta sensum  
humiliorem referantur ad Israelitas  
captivos apud Babylonios. Tene-  
bantur ingenti patriæ desiderio, tæ-  
debat ethnicarum superstitionum,  
suspirabant ad pristinos ritus ac tem-  
plum illud magnificum , quod extru-  
xerat Solomon. Iam enim sibi vide-  
bantur diutino ethnicorū commer-  
cio facti ethnici. Sed nos retrusio-  
rem intellectum sequi maluimus.  
Non addit chiliadum numerum , ut  
intelligas infinitum discrimen. Nec  
dicit, in domo tua, aut sanctuario tuo,  
sed in atriis tuis : quod est templi  
quasi vestibulum , in quod admitte-  
bantur & prophani : unde Paulus  
Hebræis scribens , appellat sanctum  
E s            seculare



seculare, κοσμικόν, quod toti pateret mundo. Nec est apud Hebræos, unus dies, sed tantum, dies. Non est enim dies ubi non lucet sol iustitiæ, & incontaminata veritas. Nusquam igitur dies est, nisi in ecclesia. In nocte sunt, qui sunt extra hanc: quod olim vaticinatus est Zacharias, cap. ultimo, de incredulis loquens: In die illa non erit lux, sed frigus & gelu. Mox de fide ecclesiæ sic loquitur: Et erit dies una quæ nota est domino, non dies, neque nox. Vulgarem diem facit solis exortus, noctem occasus. Quis igitur est hic dies & non dies? Explicat hoc Esaias cap. 60. Non erit tibi sol in lucem diei, neque ortus lunæ illuminabit te per noctē. Sed erit tibi dominus lux æterna. Utrumque duorum prophetarum locum imitatus est qui scripsit Apocalypsim.† Et civitas non habebit opus luce solis, quoniam dominus omnipotens lumen eius erit. Porro non esse lucem nisi in ecclesia, testatur Esaias eodē quod modo citavi capite,

de

† *Apoc. 22.*

de his agens qui non receperunt fidem Evangelicam : Quia ecce tenebræ operient terram, & caligo populos : Super te autem orietur dominus, & gloria eius in te videbitur. Mox subiicit de iis qui relictâ patria superstitione crediderunt Evangelio : Et ambulabunt gentes in lumine tuo, & reges in splendore ortus tui. Ad hæc quum ait, ἕως ἡλίουδας, non addit, quarum rerum; complectens universa commoda in unum conflata; quæ non possunt homini contingere extra ecclesiam. Nam quæ potest esse felicitas hominis, si in tenebris ambulet? Quandiu militamus in hoc tabernaculo, per fidem intruemur solem. At in illo cœlesti templo non est nisi unus dies, quia non est transmutatio, nec vicissitudinis obumbratio, nec ulla erroris aut ignorantiae nebula lucem offuscat. Aeternitas enim nescit ortum & occasum. Interim tamen, ambulare in luce fidei, & simplici animo sequi eum qui dixit, Qui sequitur me, non ambulat in tenebris : beatius est omnibus opibus,

E 6                      regnis,

regnis, gloriis & oblectamentis huius mundi. Hæc stulta dictu videntur, quibus Christus nondum aperuit oculos: Verum si perconteris eos quorum cordibus eluxit Christus, num velint pietatis iactura totum mundum lucrificare, detestabuntur & abominabuntur sermonem tuum. Norunt enim quantum bonum sit, quod iam velut arram tenent, & quam inæstimabile sit illud, ad quod mox sunt transferendi. Nunc illud mihi spectato, quanto desiderio teneatur domus dei qui hæc loquitur.

Elegi abiectus esse in domo dei mei, magis quam habitare in tabernaculis peccatorum. Quid est abiectum esse? Iacere in limine aut vestibulo & conculcari. Quod mendicorum est. Tanta autem est ecclesiæ maiestas & felicitas, ut quod in ea contemptissimum est, longe præstet omnibus mundi splendoribus. Sicut in cœlesti Hierosolyma, multæ sunt mansiones, quarum infima tamen potior est omnibus regum palatiis: Sic in ecclesia velut in magna domo, diversi

diversi generis vasa sunt, quorum aliud est alio honoratius, & tamen quod in his vilissimum est, preciosius est universo mundo. In corpore hominis naturali, membrum aliud alio est præstantius. Functiones quidem diversæ sunt, sed eodem spiritu vegetantur omnia. Sic in corpore Christi mystico, quod est ecclesia, diversi sunt ordines hominum, diversa munia donaque spiritus, omnes tamen membra sunt Christi, & eandem expectant hæreditatem. Quod hic infimum est, sublimius est omni fastigio mundi. Pes humani corporis beatior est oculo suis, aut canis, & cæ partes per quas egeruntur recrementa cibi ac potus, in humano corpore, beatiores sunt capite asini. Hic obiter propheta aperit fontem, quam ob rem plerique mortales, vel non accedunt ad ecclesiam, vel recedunt ab ecclesia, vel eiekti ob culpam gravantur redire. Qui tument honoribus mundanis, nolunt deponere cameli gibbos, ut per humile ingrediantur ostium. Et ex his historiis discimus,

110 ERAS. ROTEROD.

scimus, complures hæresiarchas esse factos quod ad episcopi dignitatem non admoventur. Itaque maluerunt primum tenere locum inter canes & sues, quam inter oves Christi mediocri esse loco. Hæc stulta ambitio genuit nobis Basilides, Marcionnes, aliaque inauspicata nomina. Sed quid consequuti sunt infelices? Apud homines sibi conflare sempiternam ignominiam, apud deum meruere gehennam. Quanto satius erat, vel ignotissimum esse inter oves ecclesiæ, modo nomen habeas scriptum in libro vitæ. Simili tenentur amentia, qui quum magnis ac manifestis criminibus meruerint submoverti à consortio ecclesiæ, tamen recusant profiteri pœnitentiam ut ecclesiæ reconcilientur. Humile & abiectum esse putant arceri ingressu, nudo capite nudisque pedibus stare in vestibulo, flexis genibus introeuntium preces implorare, gestare pro purpura saccum, pro unguentis conspergi cinere. Quid in causa? Quia non vident, quanta sit dignitas, quanta felicitas,

felicitas, quanta securitas versari in  
 atriis domini. Quanta vilitas, quan-  
 tumque periculum, vel ad horam esse  
 extra domum dei. Vidit hæc ille deo  
 chatus Theodosius imperator, qui  
 maluit universum imperii strepitum  
 deponere, & in abiectum pœniten-  
 tium ire locum, quam non esse in  
 domo domini. Illi ipsi pœnitentes,  
 cultu squalidi, ieiuniis attenuati, la-  
 chrymis & mœrore confecti, qui tan-  
 quam mendici iacent in limine do-  
 mus dei, multo feliciores sunt, quam  
 qui sub Satana regnant in tentoriis  
 impietatis. Siquidem hi, si modo ve-  
 re pœnitent, licet corpore sint extra  
 domum ecclesiæ, animo sunt intus.  
 Quid est igitur quod tanto ardore  
 desiderat propheta, per Christi fa-  
 ciem obtestans deum? Ut vel in ex-  
 tremo angulo, aut limine domus  
 dei, versari liceat, & vel inter abie-  
 ctissima Christi mēbra censeatur, ex-  
 tra quem nulla cuiquam est spes sa-  
 lutis. Sed si ad limen domus dei vel  
 accedamus vel redeamus, parata est  
 misericordia domini, quæ subleuat  
 infir-

infirmiſſimam noſtram , ut proficiamus ad perfectiora. Parata eſt veritas domini, ut abſcedamus in omni ſcientia ſpiritali : parata eſt gratia domini, ditans nos ſpiritalibus chariſmatibus. Poſtremo parata eſt gloria domini, quæ nos conformet in imaginem Chriſti. Chriſtus veritas eſt; Chriſtus iuſtitia noſtra eſt: quem ſi ſequamur antecedentem, fit quod dicit Eſaias: Et anteibit faciem tuam iuſtitia tua, & gloria domini colligete. Miſericordia condonat errorem, veritas illuminat mentem ne revolvaris in errorem, gratia inſtruit donis ſpiritus, ut converſus confirmes fratres tuos, & quam plurimos ab impietate revoces; quemadmodum ait beatus David, expertus miſericordiam domini magnam, ac per Nathan ad veritatem revocatus: Docebo iniquos vias tuas, & impii ad te convertentur. Hoc eſt quod hic ſentit propheta: Quia miſericordiam & veritatem diligit deus, gratiam & gloriam dabit dominus. Similiter & Paulus, per domini miſericordiam  
revocatus

revocatus à furore persequendi, & per veritatem Euangelicam edoctus viam domini, denique per gratiam sancti spiritus præclaris donis locupletatus, factusque vas & organum electum, eo profecit, ut etiam in mediis afflictionibus in domino gloriretur. Quanquam potest hic versiculus & aliter intelligi, ut misericordiæ divinæ sit, quod trahimur ad cognitionem veritatis, iuxta verbum Hieremiæ 31. Ideo attraxite miserans. Tum ut veritas sit hominis, confitentis sua mala, & agnoscentis gratuitam dei misericordiam. Hoc enim sentit Psalmus 50. Ecce enim veritatem dilexisti, incerta & occulta sapientiæ tuæ manifestasti mihi. David quandiu celabat peccatum suum, mendax erat, & fucum facere conabatur, non hominibus rantum, sed & deo. Verum deus ex sua misericordia per Nathan prophetam, revocat eum ad veritatem confessionis: declarans, inutiliter celari peccatum apud homines, quum oculos dei nemo possit fallere. Misericordiam revocan-



vocantem, & veritatem confitentem, sequitur gratia & gloria. Peraçto enim luctu pœnitentiæ, & ita castigatis membris, ut quemadmodum antea servierant iniquitati ad iniquitatem, ita facta templa spiritus sancti serviant iustitiæ ad iustitiam, fit ut glorietur ecclesia, illic superabundare gratiam, ubi abundarat peccatum, & inter angelos maior sit gratulatio super uno peccatore revocato quam super nonagintanovem iustis. Non est quidem absurdum quod adfert Augustinus, veritatem referens ad fidem dei in promissis. Solus enim ille verax est, quum sit omnis homo mendax, non quod semper fallant homines, sed quod in ipsis non sit præstare quod pollicentur, incerti an in proximum diem victuri sint. Quandiu circumferimus hoc mortale corpusculum, multis iniuriis multisque periculis obnoxium, misericordia domini circumvallat nos undique, scuti vice, ne revolvamur in vitia, veritas dei in promissis fulcitur, erigitque mentes nostras, ut contemptis

DE ECCLES. CONCORD. 115  
temptis huius vitæ bonis pariter ac  
malis feramur ad cœlestia. Concinit  
huic sensui Psalmus 35. Prætende,  
inquit, misericordiam tuam scienti-  
bus te, & iusticiam tuam iis qui re-  
cto sunt corde. Iustitia reddit cuique  
quod suum est. Quid autem reddet  
nobis deus, qui nulli cuiquam de-  
bet? Nihil enim habemus quod il-  
lius benignitati non oporteat acce-  
ptum ferri. At aliud est liberalitas, a-  
liud iustitia. Verum & illud iustitiæ  
genus est, præstare quod gratuito  
promiseris. Hac ratione deus se ipsum  
nobis quodam modo debitorem  
constituit, ut licet ipsum ob merita  
nostra non possimus appellare, ob  
promissa tamen appellare possimus.  
Quod si nos meminerimus officii no-  
stri, ille non recusat vocari iniustus,  
si minus præstat quod pollicitus est.  
Venite, inquit; & arguite me, dicit  
dominus. Hanc dei iustitiam appellat  
David, quum ait: Ut iustificeris in  
sermonibus tuis, & vincas quum iu-  
dicaris. Prorogat interdum expecta-  
tionem nostrâ deus, fallit nunquam:  
interim .

interim qui non norunt illius veritatem, obmurmurant; ac dubitant: quemadmodum illi duo discipuli, quum aiunt: nos sperabamus quod esset redempturus Israel. Quin & discipulos ingens habebat mœror, quod quia non credebant eum resurrecturum, putarent sibi data verba. Quod hic ex Hebræo vertit Hieronymus, & alii quidam, id ita discrepat ab eo quod transtulerunt septuaginta, ut non videatur eius generis esse varietas, quæ frequenter accidit ex eo, quod eadem sententia variis effertur modis, aut ex iisdem verbis alius alium sensum colligit, sed apparet, scripturâ Hebraicam in codicibus variasse. Id usu venit interdum, quum scriba aut interpres elementi similitudine deceptus, aliud pro alio legit, aut quum diversa literarum distinctio, diversum efficit sensum. Nam quod ex Hebræo reddunt, sic habet: Quia sol & scutum dominus deus, gratiam & gloriam dabit dominus. Quæ lectio si germana est, solem posuit pro veritate, quæ est  
Chri-

Christus, qui illuminat omnem hominem venientem in hunc mundum: scutum pro misericordia protegente credentes, adversus omnes insultus Satanæ. Sicuti loquitur Psalmus 31. Sperantes in domino misericordia circumdabit. Quanquam & Paulus hortatur, ut sumamus scutum fidei. & alius Psalmus dicit: Scuto circumdabit te veritas eius; nec timebis à timore nocturno. Vis igitur tutus esse ab omni malo? Nec circumferaris omni vento doctrinæ, sed quod è scripturis divinis tradidit nobis ecclesia catholica, firma fide teneamus, quod præcipit, simplici obedientia servemus, quod promittit, alacri spe expectemus. Simpliciter ambulanti- bus non deerit neque misericordia, neque veritas, neque gratia, nec ullum bonorum genus, quod ad beatitudinem pertinet. Eoque subdit: Dominus non privabit, siue non fraudabit bonis eos, qui ambulant in innocentia. Pro quo septuaginta verterunt *ἐκ ἀκακίας*, quod magis sonat simplicitatem, omnis expertem fraudis

ac maliciæ. Columbinos animos , amat spiritus sanctus. Dabit hic gloriam synceræ conscientiæ , in futuro dabit ineffabilem illam gloriam. Interim arrabone tam precioso contentus , expecta bona futuri seculi , spe gaudens , ut vere & ex animo dicas, cum propheta : Domine virtutum , beatus homo qui sperat in te. Atque hæc est complurium Psalmorū clausula. Frequenter enim repetendum est, quod oportet semper infixum esse mentibus nostris. Secundus Psalmus ita desinit, Beati omnes qui confidunt in eo. Quartus : Quoniam tu domine singulariter in spe constituiisti me. xxvi ita : Expecta dominum, viriliter age, & confortetur cor tuum, & sustine dominum. xxx ita: Viriliter agite, & confortetur cor vestrum, omnes qui speratis in domino. xxxii: In nomine sancto eius speravimus. xxxiii: Nō delinquēt omnes qui sperāt in eo. xxxvi: Salvabit eos qui speraverunt in eo. Item 41. & 42. ad spē in deo figendam hortantur. Similiter & 63. & 130. Nec est ista vulgaris spes quam

quam nubis tanto studio commendent literæ sacræ. Agricola sperat à deo lætum ægrorū proventum, nauta prosperam navigationem, grvida felicem partum, ægrotus convalescentiam. At vir pius qui vere sperat, hoc est, spem omnem fixit in domino, plena fiducia totam sollicitudinem cōiicit in deum, persuasus, siue læta obtigerint siue tristia, siue mors, siue vita, omnia per dei misericordiam cessura in bonum, inscrutabili sua sapientia sic temperātis res mortalium. Itaque quum beatus sit homo, domine virtutum, qui fiduciam omnem in te collocavit, nec id fieri possit, nisi sit intra domum tuam ecclesiam, dignare quæso aperire oculos omnium nostrum, ut videntes, quam sint amabilia, quam pulchra, quam tranquilla, quam tuta, quam felicia tabernacula tua; rursus quam his dissimilia tabernacula impietatis; positis opinionum & affectuum dissidiis, eodem sensu, eademque sententia concordēs versēmur in illa beata sodalitate sanctorum omnium: ut  
**vere**

vere de nobis dici possit; Ecce quam bonum & quam iucundum, habitare fratres in unum! Nunquam autem coalescemus in unum, nisi pariter spem nostram ponamus in Christo Iesu rege Sion ac domino nostro, & ad illum unum spectemus. Ubi regnat ambitio, ubi pecuniæ studium, ubi pervicacia, ubi cæcus favor, aut odium cæcius, ut pertendamus tueri quicquid semel diximus aut scripsimus; ubi in gratiam partium probamus quæ scimus esse improbanda, aut odio privato damnamus & ea quæ pie dicta: denique ubi quisque ad se spectat, & undique trahitur funiculus contentionis: non potest res ad cōcordiam redigi. Reputemus quam sit stultum, sic odisse mores quorundam pontificum aut sacerdotum ac monachorum, ut ipsi fiamus illis deteriores. Deterior enim est, qui recedit ab ecclesiæ consortio, & in hæresin aut in schisma demigrat, quam qui impute vivit salvis dogmatibus. Cū hoc, perquam iniquum est, nos ad aliorum vicia lynceos esse, ad  
nostra

nostra ipsorum talpis cæciores, & in aliorum oculis videre festucam, ipsos trabē in oculo circumferentes. Homines cum hominibus versamur. Quanquam gravius, fateor, peccant, qui in potestate constituti publica, non meminerunt officii sui: Tamen populi pervicacia sæpenumero in causa est, ut, qui præsumunt, alii sint quam esse conveniret. Sic populus Israeliticus pro mitissimo Samuele, accepit superbum Saulem. Placabilior erit alienis erratis, qui prius sua inspexerit. Præcipuum est discordiæ seminarium, quod sinistro tantum oculo proximorum vitia intuemur. Claudatur ille sinister, & dexter vicissim ad eorum virtutes aperiatur. Si virtutum candidi fuerimus æstimatores, levius offendemur vitiis. Inter fratrem ac fratrem, inter uxorem ac maritum non constat amicitia, nisi vicissim inter sese ad quædam vitia cōniveant. Quomodo igitur cōstabit totius ecclesiæ concordia, si quisque ad alterius virtutes lusciosus, ad vitia talos habet oculos, qualia sunt. spe-

F cula



cula quædam, quæ faciem oppositam & multo maiorem reddunt & deformiorem? Dolendum est, tam multos esse monachos, qui præter vestitum ac frigidas ceremonias minimum habent religionis: tam multos esse sacerdotes, qui nec caste vivunt, nec sacris vacant literis: nonnullos etiam abbates & episcopos, qui minimum differant à prophanis principibus aut satrapis: sed interim dissimulamus, quam multi sint inter illos pii, sobrii, docti, deque Rep. benemerentes, in divitiis pauperes, in dignitate modesti, in potentia mites. Nec cogitamus, quanto nos essemus ferociores, si tot rebus ad licentiam invitaremur. Expedit igitur, ut plebs, quæ dissimulatis sacerdotum virtutibus, vitia tantum videt exaggeratque, suam inspiciat, à tergo in pectus revolutam. Quotus quisque est opifex, ut ab infimis incipiam, qui in præstanda opera fidelis est, in mercede exigenda æquus? Nec enim temere natum est illud vulgo celebre proverbium, In sua quenque artificem

cem arte furem esse. Iam quod omnino genus rerum est, quod illi non corrumpant quæstus gratia? Quot modis vitiatum triticum ac farina? quot modis vinum ac cervisia? quot modis pannus reliquaque texta? Ommitto nunc in promissis perfidiam, in commercio supercilium ac morositatem, ut propemodum commodius sit cum rege quopiam aut Cardinale agere, quam cum latrone, qui vix habet domi unde cœnet. Qui tales sunt in servili sordidoque opificio, quales probabile est futuros, si ad eorum dignitatem evehantur, quorum mores ferre non possunt? Vulgus sacris initiatorum incontinentiam, incesti sacrilegii ac violati voti titulis exaggerant, sibi ut liberis ac solutis blandiuntur. Atqui, ne errent, nemo Christianus ad peccandum liber est, omnes religiosissimo sacramento sunt astricti, nisi forte ludum esse credunt quod in baptismo professi sunt. Si infami cognomine vocantur apostatæ, qui à Benedicti aut Francisci instituto desciscunt, quanto magis

co nomine digni sunt, qui in baptismo mundi contemptum professi, toto animo serviunt mundo, & à Christo imperatore transeunt ad Satanam? Iam adulterium crimen, quod apud ethnicos gladio, apud Iudæos lapidatione puniebatur, neutiquam leve est, utcunque nunc pro ioco ducitur. Quod si quis propius inspiciat, inveniet fraudibus, rapinis, periuriis referta omnia. Ut ne commemorem interim, quantam malorum lernam tegat umbra belli. Nihil attinet hic de magistratibus inferioribus loqui, deque iis qui ob nobilitatis titulum sibi volunt licere omnia, deque principibus. Quocunque vertas oculos, heu nimium multa est querelarum materia. Sed hæc est rerum humanarum natura, maris in morem multa secum deferre, quæ malis abesse. Mutat sæpe vitia, ponit nunquam. Quid igitur superest, nisi ut se quisque discutiatur, & omnes ad Christi misericordiam confugiamus? Quædam vitia leviora sunt, quam ut expediat asperam admoveere medicinam.

nam. Quædam minore religionis incommodo dissimulantur quam exagitantur. Porro quæ graviora sunt, quam ut oporteat dissimulare, manum doctam & artificem requirunt, ne nobis eveniat quod solet imperitis medicis, qui dum parum dextre admovent remedia, pro morbo extinguunt hominem, aut ex leviori malo reddunt immedicabile. Pleraque paulatim ac per occasionem irrepserunt: ea paulatim ac per occasionem tollenda sunt, si fieri queat absque gravi tumultu: sin minus, dissimulanda, donec ipsa dies porrigat occasionem commodiorem. Eadem dexteritate utendum est in dogmatibus. Quidam dum impotenter vociferantur, hæresis, hæresis, ad ignem, ad ignem, in peiorem partem interpretantes quæ dicta sunt ambigue, per calumniam depravantes & quæ pie dicta sunt, plurimum favoris conciliarunt iis quos exitio dignos iudicabant. Rursus qui sub Evangelii plausibili titulo moliuntur ea, quæ ex diametro pugnant cum Evangelio, ve-

hementer adiuverunt partes eorum quos oppressos volebant. Itaque dum illi nihil omnino patiuntur innovari, hi nihil sinunt relinqui, tempestas orta est pene insedabilis, & dum utrinq; nimium tenditur funiculus contentionis, fit, ut utraque pars rupto fune in tergum cadat. Non quod ecclesia concidat, quæ nixa saxo immobili Christo, nullis turbinibus concutitur, sed de quibusdam hominibus loquor, qui causam ecclesiæ tuentur, magno quidem zelo, non enim dicam malo, sed non secundum scientiam. Nondum eo processit hoc morbi, ut sit immedicabile. Extingui potest hoc incendium, si materiam igni subtrahamus. Præcipuus autem huius tumultus fons sunt impii mores hominum. Non est quod alii in alios culpam reiciamus. Primum hoc humani generis exemplum est, sed ut per se pravam, ita nobis infelix: Mulier decepit me, serpens decepit me. Omnes iram domini provocavimus, restat ut omnes ad illum simul synce-

ro corde convertamur: ille, ut est exorabilis, vicissim converteretur ad nos, atque hos inconditos rerum motus vertet in tranquillitatem, nobis eodem pro nostra quantulacunque portione annitentibus. Quo pacto, inquis, id fiet? Sit unusquisque quod esse debet: Sint pontifices, pontifices, Christi vicarii, sincero corde gregis dominici curam agentes. Sint principes, principes, divinæ iusticiæ ministri, tanquam deo reddituri rationem, quem hoc magis oportet ab illis timeri, quo liberiores sunt à timore hominum. Magistratus bona fide remp. administrent. Monachi perfectionem quam titulo profitentur, moribus præstent. Sacerdotes noctes ac dies meditentur in lege domini, quo possint esse sal populi. Qui laici sunt, sint quod dicuntur, non præeant, sed reverenter obtinerent sacerdotibus, fideliter pareant principum legibus, in suo quisque officio probet suam conscientiam summo illi *καρδισγυῖον*. Nam beati Lucæ verbo libenter utimur. Qui ne-

gociator est, bona fide negotietur: qui molitor est, bona fide sit molitor: qui pistor est, bona fide sit pistor: qui faber est, bona fide sit faber: qui vestiarius est, bona fide sit vestiarius, fiduciam habens in eo qui non deserit rectos corde. Atque idem de cæteris dicendum est. Nemo suis vitiis hoc nomine blandiatur: Ita mos est, sic nemo non facit. Ne circumspicias, ô bone, quid alii faciant, sed quid abs te fieri velit supremus ille iudex, cuius oculos nemo fallit, ad cuius tribunal omnes sistendi sumus, sive reges, sive inopes erimus coloni. Ibi non valebit hæc tergiversatio: Ita mos est, sic nemo non facit. Interim ponatur ambitio, & pertinax vivendi studium, facessant favores cum privatis odiis, consilescat dementis rixæ surda vociferatio: ita demum elucescet veritas illa pacifica. Accedat illa συγκατάθεσις, ut utraque pars alteri sese non nihil accommodet, sine qua nulla constat concordia. Sed hæcenus obsecundetur, ut ne moveantur τὰ ἀκίνητα: & hæc-

hactenus feratur hominum infirmitas, ut paulatim invitentur ad perfectiora. Illud autem omnibus penitus infixum esse oportet, nec tutum esse, nec ad fovendam concordiam utile, temere desciscere ab iis quæ maiorum autoritate tradita sunt, quæque longo seculorum usu consensuque confirmata. Nec quicquam omnino novandum est, nisi huc aut cogat necessitas, aut insignis invitet utilitas. De libero arbitrio, spinosa est verius quam frugifera disputatio. Et si quid de hoc quærendum est, in Theologicis diatribus sobrie discuciatur. Interim inter nos illud convenire satis est, hominem ex suis viribus nihil posse, & si quid ulla in re potest, totum eius deberi gratiæ, cuius munere sumus quicquid sumus, ut in omnibus agnoscamus imbecillitatem nostram, & glorificemus domini misericordiam. Conveniat inter nos, fidei plurimum esse tribuendum, modo fateamur, & hoc esse peculiare spiritus sancti donum, idque multo latius patere quam vulgus homi-



num credit, nec omnibus adesse qui dicunt, Credo Christum pro me passum esse. Concedamus, fide iustificari, hoc est, purificari corda credentium, modo fateamur, ad consequendam salutem necessaria charitatis opera. Neque enim vera fides potest esse ociosa, quum sit focus & seminarium omnium bonorum operum. Quin potius distinguamus iustitiam repurgantem mentis nostræ domicilium, quam recte dixeris innocentiam, & iustitiam ornantem ac locupletantem eam bonis operibus. Deus proprie nulli debitor est, nisi forsitan ex gratuito promisso. Quamquam & hoc ipsum, ut præstemus promissi cōditionem, illius est magnificentiæ: non tamen reiiciendum est mercedes aut meriti vocabulum, quod deus quæ in nobis, aut per nos operatur pro sua bonitate acceptat ac pensat. De verbis nulla sit digladiatio, modo de re conveniat. Nec interim ingerantur auribus imperitiæ multitudinis illa *παιδαγωγία*: Nihil refert qualia sint nostra opera, tantum habere

habeto fidē, & servaberis : Et, homo quicquid agit nihil aliud quam peccat. Quæ ut in aliquo sensu vera sint, tamen ab imperitis alio rapiuntur quam expedit. Quemadmodum & illæ voces, Christus pro nostris peccatis dependit. An ille pro nobis mortuus est, ut nos vivamus in peccatis? an potius, ut semel illius sanguine loti, abstinemus ab omnibus inquinamentis? Mortuus est, & resurrexit, ut ipsum imitantes, moriamur peccatis, & in vitæ novitatem resurgamus. Pro nobis crucem gestavit. sed idem clamat: Qui non tollit crucem suam quotidie, non est me dignus. Cæterum qui dominum suis sceleribus quotidie, quod in ipsis est, crucifigunt, iis mors illius adeo nihil profutura est, ut cessura sit in gravem supplicii accessionem. Pii cuiusdam affectus est, credere, preces ac bona opera viventium prodesse defunctis, præsertim si hæc illi dum viverent facienda curarunt. Tantum admoneantur, qui funebres pompas ac missas gloriæ causa instituunt, per-

dere mercedem suam : ac certius esse  
 lucrum , si , quod morientes legant ,  
 vivi ac sani in pios usus erogent. At  
 quibus hoc nondum persuasum est ,  
 ne obstrepant aliorum simplicitati ,  
 sed ipsi tanto benignius sublevent  
 pauperum inopiam , tantoque fer-  
 ventius incumbant bonis operibus ,  
 quo minus credunt , defunctos vivo-  
 rum benefactis iuvari. Religiosi item  
 affectus est , credere , sanctos ac sanctas ,  
 quos deus adhuc mortali corpore  
 gravatos tanti fecit , ut ad illorum  
 preces , dæmones expulerit , mortuos  
 ad vitam revocarit , nunc quoque non  
 nihil apud eum posse. At quibus di-  
 versa sedit opinio , pura mente , syn-  
 ceraque fide invocent patrem , filium  
 & spiritum sanctum , ne obturbent o-  
 diose iis , qui citra superstitionem  
 implorant divorum suffragia. Super-  
 stitio , quā fateor in invocatione cul-  
 tūque divorum esse plurimam , coar-  
 guenda est prius , ac simplex affectus  
 interdum tolerandus est , etiam si sit  
 cum aliquo coniunctus errore. Ut  
 nostra vota non sentiant divi , sentit  
 tamen

tamen Christus, qui & amat simplices animos: si minus per sanctos, certe pro sanctis dabit nobis quæ petimus. Qui sævierunt in divorum imagines, non prorsus abs re concitati sunt ad eum zelum, licet immodicum, mea quidem sententia. Nam horribile crimen est, Idololatria, hoc est, simulachrorum cultus: qui tamen si iam olim sublatus est è moribus hominum, tamen periculum est, ne technis dæmonum eodem revolvantur incauti. Sed quum statuaria & pictura olim inter liberales artes habitata sit tacita poësis, plus interdum repræsentans affectibus hominum quam homo quamvis facundus possit verbis exprimere; & Plato, agnoscens, poësim plurimum habere momenti ad Remp. bene secusve instituendam, non omnes poëtas submo-  
verit ex illa quam fingit civitate, sed Homerum tantum aut Homeri similem, qui diis ac deorum filiis attribuit adulteria, puerorum amores, furta, mendacia, impotentes iras, dissidia, aliaque vitia, quæ nemo bo-  
nus

nus Reip. gubernator ferret in suis civibus, aut frugi paterfamilias in uxore, liberis aut famulis: corrigendum erat, quod per imagines irrepsert superstitionis, utilitas erat servanda. Utinam omnes omnium ædium parietes haberent vitam Iesu Christi decenter expressam; in templis autem, quæadmodum in Aphricano concilio decretum fuit, nè quid recitaretur præter scripturas canonicas! ita conveniret nullam esse picturam, nisi cuius argumentum in canonicis scripturis contineretur. In peristyllis, porticibus & ambulacris possent & alia pingi ex humanis historiis desumpta, modo facerent ad bonos mores. Stultas vero aut obscenas aut seditiosas tabulas oportuit non solum è templis verumetiam ex omni civitate sublatas esse. Et quemabmodum blasphemix genus est, sacras literas ad ineptos ac prophanos detorquere iocos, ita gravi poena digni sunt, qui dum pingunt canonicarum scripturarum argumenta, de suo capite miscent ridicula quædam,

quædam, ac sanctis indigna. Si libet ineptire, à Philostrato potius petant argumenta. Quanquam sunt & in ethnicorum annalibus multa argumenta; quæ idiotarum oculis utilis utiliter exponi possent. Ergo cui persuasum est, divorum imaginibus, quoniam non sentiunt, nihil habendum honoris, fruantur suo sensu: ne tamen obstrepant iis, qui citra superstitionem sic venerantur imagines eorum amore quos representant, quemadmodum nova nupta sponsi absentis amore exosculetur anulum aut strophium ab illo relictum aut missum. Hic affectus deo non potest ingratus esse, qui non è superstitione, sed ab abundantia quadam amoris proficiscitur. Idem sentiendum est de iis, qui simili affectu exosculantur ossa aliasve reliquias sanctorum. In his Paulus opinor concederet, ut in suo quisque sensu acquiescat. Novi Theologum, qui cum videret, quendam per cœmeterium euntem, nam erat iter publicum, non aperire caput ad signum crucifixi, haud quidem

dem de studio, sed intentum fabulis  
comitum, quibuscum deambulave-  
rat, miro zelo dixit ad suos confabu-  
lones, ausim iurare illum esse Lute-  
ranum. Illud profecto non recte :  
quemadmodum altera pars peccat,  
odiose obstrepens, non superstitioni,  
sed simplici religiosoque affectui  
nonnihil tribuentium imaginibus.  
Illud citra noxam omnibus potest in-  
culcari, divos ac divas optime coli  
imitando vitam illorum. Idem qui-  
bus nondum persuasum est, horum  
temporum sacramentalem confessio-  
nem fuisse ab ipso Christo institu-  
tam, servant eam ut rem salutarem,  
multisque commendabilem utilita-  
tibus, ac multorum seculorum usu  
comprobatam. Ut autem illa tum tu-  
rior sit, tum minus gravis, magna ex  
parte in nobis situm est. Videlicet si  
deligamus integrum, eruditum, ac  
silentii tenacem sacerdotem, nec  
eum ambiguis ac perplexis sermoni-  
bus remoremur, ut percontando co-  
gatur velut expiscari crimina, sed  
simpliciter tanquam coram deo ape-  
riamus

riamus ea duntaxat, quæ certo sunt letalia vulnera. Quod genus sunt, adulterium, homicidium, furtum, ebrietas enormis ac voluntaria: obrectatio maliciosa, quod homicidii aut veneficii genus est: periurium, fraus, rapina, aliaque huius generis seu facto perpetrata, seu certo animi proposito destinata: quibus enim nihil defuit præter occasionem, iam perpetrarunt. Absit autem repetendi confessionem superstitio, absit anxietas numerandi commissæ & circumstantias, aut totam iterandi confessionem apud alium sacerdotem, si quod crimen in priore fugit. Præcipua cura sit, ut quod omissum est detestemur, & in pristinum remigremus affectum. Illud omnium caput est, sic instituere vitam, ut non incidamus in ullum crimen letale. Id qui potest, liber est ab onere confitendi. Leviores culpas vitare vix cuiquam concessum est in hac vita: at non difficile est, auxiliante deo, vitare crimina, ei qui semel sit radicans in charitate dei ac proximi. Hoc igitur  
 funda-



fundamentum, ante omnia iacendum ac stabiliendum est in animis nostris. Quod si accidat, in crimen prolabi, non est necesse protinus ad sacerdotem currere, sed ad deum illico confugiendum est. Cum illo statim redeundum in gratiam, ut sacerdoti quoque confitearis, expectanda est temporis oportunitas. Cōsultum tamen est, culpas, de quibus dubitas, criminales sint necne, sacerdoti quum opportunum fuerit referare. Idem dico de factis, de quibus ambigis, utrum legitima sint an non. Cōplures enim perplexi casus incidunt in vita mortalium, veluti de usura, de matrimonio, de restituendo, de votis. Qui credunt, eam, ut nunc est, à Christo institutam, tanto observent religiosus, sinantque alios in suo sensu acquiescere, donec sacrosancta synodus aliquid expressius de hoc pronunciarit. Hoc pacto fiet, ut nec scindatur omnino Christiana concordia, nec mores infirmorum in omnem licentiam proruant. Inmissam si quid superstitionis aut sordium

dium irrepsit, æquum est corrigere. Ipsam missam quæ usque adeo excremur non video. Constat psalmodia, qui dicitur introitus, doxologia, precatone, sacris canticis, recitatione verborum prophetarum aut Apostolicorum, quam vocant epistolam, recitatione Evangelii, professione fidei catholicæ, gratiarum actione, quam appellant Eucharistiam, ac religiosa commemoratione mortis Dominicæ, rursus precatonibus, inter quas est precatio Dominica: dein sequitur pacis Christianæ Symbolum, mox communio, rursus sacrum canticum, & precatio. Postremo loco sacerdos totum populum velut in suam tutelam receptum, dei benedictioni tradit atque commendat, ut perseverent in affectu pietatis, mutuaque charitate. Quid in his non pium ac venerandum? Quos offendit sordida turba conductitorum sacrificulorum, submoveant indignos, dignos retineant. Quibus non placent profæ, præsertim indoctæ, licet eas prætermittere.

Neque

Neque enim Romana ecclesia ullas novit profas. Similiter & cantionem quam nunc in nonnullis templis cantunt, post consecratum corpus & sanguinem Dominicum, pro pace, aut contra pestilentiam, aut pro felici proventu frugum, sine religionis detrimento liceret omittere. Id enim omnino præter veterem morem inductum est. Nam id temporis olim populus non cursitabat ad videndum id quod sacerdos ostendit, sed prostratis humi corporibus, animis in cœlū erectis, gratias agebat Christo redemptori, qui nos suo sanguine lavit, sua morte redemit. Nihil porro tale novit ecclesia Romana. In sacello pontificis, non est nisi unicum altare, & unicum sacrum. Quin & hodie in multis ecclesiis Romanam imitantibus, non licet privatim sacrificare duntaxat id temporis, quum summum peragitur sacrum. Illorum insolētia est arguenda, qui cum summi sacrificii tempore ambularint, nugantes de rebus frivolis, proprium requirunt sacerdotem, qui ipsis proprie.

prie sacrificet: aut in vespertino cultu, quemvis obvium arripiunt sacerdotem, qui ipsis separatim dicat vespertinas laudes, etiam si iam suas absolvit: qui si recuset, sic commoventur, ut periculum sit ne illi pugnos in faciem ingerant. Adeo quod publicum est contemnitur, & quisque privata quærit. Si non placet in templis illud modulatæ musicæ genus, & organorum cantus; possunt citra pietatis iacturam omitti: si placet, curandum est ut illa quoque musica sit digna templo dei. Iam & illud non recte fit in quibusdam ecclesiis, ut ob musicorum aut organorum concentum omittantur aut decurantur ea quæ sunt præcipua. Hora prope consumitur in prosa, ac decurtatur Symbolum fidei, & omittitur precatio Dominica. Nec minimum temporis absumunt illæ vocum caudæ, ad singulos versus in longum productæ. Atqui præstabat, cultum solennem nullis supervacaneis verti in tædium. Ad superstitionem vergunt tot peculiaria missarum  
argu-

argumenta, missa de spinea corona, missa de præputio Christi, missa pro navigantibus, pedestri aut equestri itinere peregrinantibus, pro sterilibus, pro gravidis, pro parturientibus, pro febre quartana aut tertiana laborantibus. Hæc & huius generis multa facile possent vel tolerari vel corrigi. Nec erat necesse ut missam tot seculis receptam, quasi rem pestilentem & impiam exigeremus. Iam quæ quidam tradiderunt de qualificatione, de merito principali & secundario, de opere operante & operato, poterant inter humanas opiniones seponi, donec super his quoque synodus pronunciaret, aut suo quenque arbitrio relinqueret. Sacrificii atque immolationis vocabulum veteres sacri doctores non horruerunt. Christus semel mortuus non moritur iterum, fateor, sed unicum illud sacrificiū mysticis ritibus quotidie quasi renovatur, dum ex illo fonte inexhausto nobis novam subinde gratiam elicimus. Immolamus hostiam pro vivis ac defunctis, dum  
pro

DE ECCLES. CONCORD. 143  
pro illis patrem per filii mortem ob-  
testamur. Postremo quum omnis  
precatio, laus & gratiarum actio, re-  
cte dicatur sacrificium, maxime no-  
men hoc convenit in missam, hæc o-  
mnia sacratius continentem. Sunt  
qui requirant in missa communio-  
nem. Sic fateor fuit à Christo institu-  
tum, & olim ita consuevit observari.  
Verum id quo minus fiat, haud stat  
per sacerdotes, sed per laicos, in qui-  
bus heu nimium refrixit charitas.  
Cœlestis ille cibus non est obtruden-  
dus invitis, aut nauseantibus: a vide  
petentibus non negabitur. Nunc quæ  
possit esse communio quum quibus-  
dam in locis templa fere sint: vacua  
communione tempore? Quidam a-  
persi mox abeunt domum, & ante  
introitum faciunt exitum. Alii post  
auditum & non intellectum Euange-  
lium abeunt. Atqui posteaquam sa-  
cerdos dixit, sursum corda, & gratias  
agamus, tum præcipuæ populi partes  
erant, quando tacente sacerdote  
quisque cum deo loquitur. Atque  
interim illi fabulantur in foro, aut  
potant

potant in popina. Quanquam & hi verecundius faciunt iis qui toto sacro nugantur in templis. Denique tametsi inter sacrificantem & assistentes non est signorum Sacramentalium communio, quæ nec olim inter omnes fuit, est tamen sacræ doctrinæ, piæ exhortationis, precationis, laudis & gratiarum actionis, communio. Commune est igitur quod vivificat; illud commune non est quod sine illis nihil prodest. Sed obiicitur scrupulus de adorando: Si in Eucharistia totus est Christus, quare non est adorandus? Quanquam Christus in eo sacramento est, sub ratione cibi ac potus, ut summa cum animi puritate sumatur, non ut ostentetur, aut in ludis publicisque pompis circumferatur, aut in equo circum arva vehatur: Id nequaquam est veteris exempli. Sed in hoc multitudinis affectui plus satis indultum est. Quidam sibi valde pii videntur, si quoties sacerdos sinit videri corpus domini, undique accurrant, ac è proximo defixis oculis intueantur.

Quan-

Quanto religiosius erat, cum Publicano procul à cancellis abstinere, & corpore humi fuso, mente adorare crucifixum? Nullus est tam stolidus, ut humanam Christi naturam adoret pro divina, aut ut panem & vinum adoret pro Christo.

Quoniam autem nemo certus est, an sacerdos vere consecraverit, præter ipsum unum, nullus adorat ibi Christum, nisi sub tacita conditione: & tamen id quod in Christo proprie adoratur, nusquam non adest. Adde huc, quod nullum sit sacramentum tam humile cui non assistamus nudis capitibus quum administratur, velut in baptismo, in confirmatione puerorum: quid sentiunt igitur, qui putant, idololatriam esse, si huic sacramento capud aperiant, etiamsi Christi corpus & sanguis tantum ibi sint in sacro signo? Quot porro videmus Sacramentarium formas? Quoties ipsi suam mutant sententiam? quoties alienam reiecerunt? Nam & nuper exortus

G

est,



est, qui tam impiam de hoc sacramento sententiã commentus est, ut totum sustulerit sacramentum. Neque enim sacramentum dici mereatur, quod nullo externo signo, sed tantum animi cogitatione peragitur. Hæc qui faciunt, utrum sibi videntur talis ludere, an de gravissimis rebus disputare? Quod si ambigunt, ut ipsa declarat res, quanto satius erat in eo perseverare, quod nobis tradiderat ecclesia catholica? Tradidit autem, ibi verum esse corpus & sanguinem domini, haud dubie quin vivum. Quod si credimus, in sepulchro divinam naturam non fuisse separatam ab exanimi corpore domini, quanto credibilius est, eam à vivo corpore non esse separatam in sacramento? Itaque si in hoc concordemus, cætera quæ disquiruntur, quomodo sit ibi corpus & sanguis domini, sub panis substantia, an sub speciebus panis & vini, & quid accadat sumpto corpori, & si qua sunt his similia, poterant in synodo

odo definiri. Nunc dum quisque de re tanta quod libet comminiscitur, nonne illud unicum piarum mentium solatium ac delictum quodammodo in nauseam vertimus? Turbam festorum dierum, quos vel episcopi multitudinis affectibus indulgentes induxerunt, vel Romani pontifices causis non necessariis instituerunt, ipsi facile patientur abrogari. quod genus sunt festum conceptionis & nativitatis virginis matris, item festum præsentationis in templo. Et haud scio an expediret, nullum omnino festum solenne indici, nisi cuius argumentum extet in sacris literis. Diem dominicum semper excipio. Facile patientur, esse festa pauciora, modo ea quæ supersunt, maiore religione celebrentur. Non est omnino prophanus dies, quo licito labore citraque fraudem paratur, quod uxorem alar, ac liberos aut proximi sublevet inopiam. Festa quæ sodalitates sibi privata constituunt auctoritate, una cum ipsis sodalitatibus à

magistratu tollenda sunt. Nihil enim aliud sunt quam Comi & Bacchi conventicula. Delectum ciborum ac ieiunia non indixit ecclesia nisi ad sanitatem corporis & animi. Itaque qui piscium esu periclitantur aut ieiunio, & valetudinem corporis & animi vigorem lædi sentiunt, hos nequaquam obligat ecclesiæ constitutio. Qui vero sentiunt, se ex abstinentia carniū & ieiunio & corpore & animo melius habere, quæ rogo contumacia est, velut in odium ecclesiæ hoc reiicere, quod tantam adfert utilitatem? Hic igitur nullus alium diiudicet, vescens non insultet abstinentibus, abstinentes non condemnent vescentes, etiam si causa non sit evidens. Suo domino stant aut cadunt. Idem sentio de cæteris episcoporum constitutionibus: quæ si piæ sunt, si utiles, si æquæ, ob hoc ipsum servandæ sunt, quod tales sunt: & si displicet legis vocabulum, amplectamur eas tanquam salubria consilia. Si servus de lapide em-

DE ECCLES. CONCORD. 149  
 de emprus dattibi consilium utile,  
 auscultas & obtemperas, non quia  
 servus dedit, sed quia est in rem  
 tuam. Et noseorum consilia reiici-  
 mus, qui publica dignitate præmi-  
 nent, quique nobis patrum ac docto-  
 rum loco sunt? Hæc eo spectant,  
 non ut quæ dicimus pro certis habe-  
 ri velimus, aut præeamus Ecclesiæ  
 quid sit statuendum; sed ut interim  
 dum apparatur synodus, ipsi dissen-  
 sionum causas omnes, quantum in  
 nobis est, amputemus; nihil per vim  
 ac tumultum agamus, neque cui-  
 quam hoc faciamus, quod si nobis  
 fieret, cœlum ac terram ac maria in-  
 clamaremus; neque quenquam ad  
 novam religionem à qua abhorret,  
 perpellamus. Æquissimum enim est,  
 ut qui sibi religionis causa vim fieri  
 nolunt, ab aliis eam abstineant: præ-  
 sertim quum hic quoque melior sit  
 causa tam longi præscriptione tem-  
 poris sese tuentium. Hæc admonitio  
 ad utramque partem attinet: si mo-  
 derata συγκατάλας præmolliat dissi-

diorum paroxysmum, fiet ut synodi  
medicina felicius operetur ad con-  
cordiam. Sic enim medici priusquam  
porrigant validum pharmacum, le-  
vibus quibusdam ac blandis potiun-  
culis, sirupos illi vocant, præparant  
corpora. Hoc exemplum utinam o-  
mnes imitemur. At vereor ne sint,  
qui vel ob inopiam iudicii, vel ut ipsi  
sint in tuto, properent sic exulcerare  
omnia, ut frustra coeat synodus.  
Quis autem malus genius effascina-  
vit infelices anabaptistas? Nam au-  
dio, hos errore falli, magisquam in-  
citari malitia, ut ad istum modum in  
proprium ruant exitium. Non sufficit  
illis baptismus, qui mille quadrin-  
gentis annis suffecit ecclesiæ catholi-  
cæ? Nam temporibus Augustini tam  
vetus erat consuetudo tingere infan-  
tes, ut huius exempli autor ignora-  
retur, admodumque probabile esset,  
ab ipsis Apostolis fuisse inductum.  
Quamquam enim non est expressum  
in sacris libris, qui Apostoli baptiza-  
rint infantes, tamen ex his sumitur  
non

non levis cōiectura. Paulus enim\* fatetur, se baptizasse tres familias, Crispi, Caii, & Stephanæ. Et apud Philippenses† noctu baptizavit carcerarium cum universa familia. Et Petrus in Actis 10 baptizavit Cornelii non solum familiam, sed etiam cognatos ac necessarios, quos ille sub adventum Petri convocarat. In his familiis probabile est fuisse nonnullos infantes aut pueros. Christus ait: Date Cæsari quæ sunt Cæsaris. Et Apostolorum principes Petrus ac Paulus diligenter admonent, ut Christiani cives obtemperent regibus ac præfectis, licet idololâtris. Volunt, servum baptizatum fidelius etiam servire heri suo, quam antea fecerat: & isti gravantur parere principibus, eodem lavacro tinctis, eandem professis religionem? Dicuntur exigere à suis rerum omnium communitatem. At ista quidem fuit aliquandiu temporibus Apostolorum in primordiis ecclesiæ nascentis, ne tum quidem in-

G 4

ter

\* 1. Cor. 1.

† Act. 16.

ter omnes Christianos. Nam latius propagato Euangelio non potuit servari communitas, exitura videlicet in seditionem. Hoc ad concordiam est, & accommodatius, ut rerum proprietas ac dispensandi ius sit penes legitimos dominos, charitas vero faciat usum communem. Nunc audimus, apud Bohemos exoriri novum Iudæorum genus, Sabbatarios appellant, qui tanta superstitione servant Sabbatum, ut si quid eo die inciderit in oculum, nolint eximere, quasi non sufficiat eis pro Sabbato dies Dominicus, qui Apostolis etiam erat sacer, aut quasi Christus non satis expresserit quantum tribuendum sit Sabbato. Beatus Paulus anathema minatur Angelo, qui vel cœlitus adferret aliud Euangelium quam ipse tradiderat. Nunc multorum animos adeo conspiciamus vacillantes, ut si vel obscurissimus homuncio proferat novum dogma, licet absurdum, inveniatur discipulos.

Unde.

Unde tāta vacillatio in animis Germanorum, qui semper cæteris nationibus fortitudinis & constantiæ laude præcelluerunt? Quid nobis felicius, si positis diffidiis concordēs versemur in domo domini? Agit hoc summo studio Carolus Cæsar, agit idem Romanorum, Hungariæ, Bohemiæque rex Ferdinandus, princeps singulari pietate præditus. Nec Christianissimus Gallorū rex in hoc negotio suo cognomini non est responsurus. Nec Anglorum rex obliviscetur, se, non ita pridem, defensoris fidei catholicæ speciosum meruisse titulum. Qui Clementis pontificis ingenium propius norunt, pollicentur, illum ad æquissimas conditiones descensurum, modo sarcatur ecclesiæ pax. Nec defutura est eruditorum Cardinalium æquitas. Res auspice Christo feliciter cessura est, si cæteri quoque principes ac civitates huc intendant animum. Iam nimium diu rixis indultum est: vel delassati quæramus concordiam. Si domini

G 5                      leni-



lenitas nos provocat ad licentiam, quæ ad pœnitentiam debebat invitare, verendum est, ne furor fiat læsa sæpius patientia, & quod de Iudæis scripsit Paulus, perveniat in nos ira dei in finem. Ne regum quidem mansuetudine abuti consultum est. Non ignorant illi vires suas, sed, pro sua clementia, mollioribus si fieri possit remediis huic malo mederi malunt quam cauteriis aut sectionibus. Fortasse nos credimus dormire Cæsarem. at is plane vigilat in hoc negotio. lentior est, sicut oportet principem summa potentia præditum non esse præcipitem in rebus gerendis: sed tamen ille tandem perficit, quidquid animo destinavit semel. Regis Ferdinandi bonitas & animus plane philosophicus, qualem in principe requirit Plato, non meretur contemptum, sed abundantio rem reverentiam, ac religiosiorem obedientiam. Nunquam habuere felicem exitum ausus Cyclopici, & inconsulta temeritas: Sed, ut verissime dixit ille vates

DE ECCLES. CONCORD. 155  
tes acutissimus, Vis consili expertus  
mole ruit sua, Vim temperatam di  
quoque provehunt In maius. Ergo  
si moderatis consiliis, affectibusque  
sedatis, incubuerimus ad sarcendam  
ecclesiæ concordiam, fiet quod vati  
cinatur Esaias? Et sedebit populus  
meus in pulchritudine pacis, & in  
tabernaculis fiduciæ, & in requie o  
pulenta. Iamque simul omnes uno  
ore nobis invicem gratulantes dice  
mus, Quam amabilia tabernacula  
tua, domine virtutum!

F I N I S

G 6

Clarif.

*Clariss. Doctissimæque viro*

D. DES. ERASMO

ROTTERODAMO,

Domino in maioribus obser-  
vando,

IULIUS PFLUG

S. D.

**F**Acit charitas, in quam infixus  
sum, ecclesiæ, ut quamvis ipse  
illi præsidium afferre haud possim,  
de omni tamen statu eius cogitare  
non desinam: ex quo certe ipso ube-  
rem capio fructum, sive in mentem  
venit mihi quod consoletur, sive  
quod terreat. In quorum ego cogi-  
tatione ita versor, ut altero animus  
meus recreetur, altero vero munia-  
tur contra casus impendentes. Ma-  
lum enim cum advenit diu ante pro-  
visum, levius esse solet. Accedit eo-  
dem singulare quoddam officii vin-  
culum. Nam cum publicum in Ec-  
clesia

clesia munus sustineam, etsi ad eam  
constituendam facultas mihi non  
suppetit, voluntate tamen mihi eo  
est incumbendum. Itaque quum a-  
liam officii tribuendi rationem inire  
nequeam, facile adducor, ut tuam  
tuique similium, qui & doctrina &  
autoritate florent maxime, fidem  
implorem. Hæc eo ad te scripsi, ut  
ad causam, quæ mihi cum omnibus  
bonis communis est, intelligas, pri-  
vatum etiam officium accedere, ut si  
nimius fuerim in urgendo, des ve-  
niam mihi, quum me illo affectio  
haud iniusta rapuerit. De statu autem  
religionis est omnino ut scripsisti: id  
enim re ipsa experior. Nec mihi hoc  
tempore facile occurrit quod ani-  
mum levet ægitudine: cum præser-  
tim scelerum eorum, ob quæ plagas  
illas, & eas quidem iustas, deus no-  
bis infligit, nullum faciamus fi-  
nem. Quod autem cogitas rudem su-  
mere, illud tibi profecto per eum,  
qui tribuit ut posses hominum gene-  
ri præclaram operam navare, nun-  
quam

quam licebit: & eo quidem minus, quod ut extrema cygnorum vox consuevit esse suavissima, ita sanctissimæ esse solent voces extremæ optimi cuiusque, qui eas edit una præpe cum spiritu extremo. Etsi igitur habes, quo repudies typographorum postulata, non tamen reperies, quemadmodum ei, qui iure quodam suo imperare poterit, satis facias, nisi parcas. Sed quid ago? Ita tecum quodammodo loquor, quasi senectus tua non & operosa sit, & plane talis, ut eam nobis diuturnam fore sperem. Quin animum ad ea, quæ tu nobis præclara parere non desinis, conferens, intellige, haud obscure iis, quæ à te optimus quisque desiderat, non modo non orbari senectutem tuam, sed etiam augeri. Vigent enim in te omnia ea, quibus rei Christianæ prodesse possis, & haud scio an magis etiam, quam in ætate florente. Quæ quidem res spem ostendit, fore, ut inquam ecclesiam multa tua officia extant, de ea diu bene mereri possis.

Atque

Atque hæc quidem amantissimis literis tuis provocatus scribenda putavi, non ut te ista ætate atque autoritate virum ipse homo iuvenis atque rudis monerem, sed ut in quem me duces sermonem, sequerer. In quo ipso dum brevitatem vito, verbosior & ineptior nescio quo pacto fui, quam deceret. Venio nunc ad Iulium Camillum & Augustinum Eugubinum: quorum alterum cum Venetiis essem de facie novi tantum, cum altero vero congressus & locutus sum sæpe, qui me ea re devinciebat sibi, quod mihi quotiescunque vellem faceret potestatem introeundi bibliothecam Antoninam: Amphitheatrum Camilli si eam nobis utilitatem afferre posset, quam pollicetur, libenter me facerem unum è spectatoribus in eo. Ac, si apud te disceptantem causam dicit eloquentia, iam vicit. Nam (si te bene novi) contra eam nunquam tu statues, cuius beneficio tantus es, ut vivas in oculis omnium fere gentium. Itaque nihil attinuit

Camil-

Camillum, eam ad pedes tuos abiicere. Sed illi potius placandi fuerunt, qui negant, cum eloquentia cognitionem rerum coniungi posse: quasi vero inquinare loqui sit sapere! Iam vero tuam ad Eugubinum epistolam iamdudum legi. In qua tu illum amanter sane, & singulari cum gravitate mones. Qui utinam obtemperasset tibi. Nam sic fere fit, ut quam quisque voluptatem maledicendo capit, eam male audiendo amittat. Qua in re eventus cum ipsa iustitiæ æquabilitate bellissime congruit. Quo magis miror, quid homini venerit in mentem, cunctam nationem nostram tanta contumelia afficere. Quod si te optima monentem audire noluiſſet, suam tamen ipsius rationem si adhibuiſſet in consilium, virus illud in nos tam turpiter non evomuiſſet. Sunt certe in singulis nationibus qui sub figura hominum immanitatem gerunt belluarum. Sunt item, qui cum ingenio, tum vero etiam virtute excellunt.

Hoc

Hoc qui negat, nã is aut rudis est in cognitione rerum humanarum, aut plane impudens. Qui igitur universæ alicui nationi in opprobriis obii-  
cit, quæ sunt certorum civium labe-  
s, quæ id tandem fronte facit? Cur non  
potius laudat ob certorum civium  
virtutes? id quod cum officio boni  
viri multo est coniunctius. Nonne  
qui ita reprehendit, idem sentit, se  
patriam quoque suam, cum in eo-  
dem vel simili sit crimine, premere,  
& tacita quasi sententia sua damnare?  
Sed quid si non tam vitia exprobrat,  
quam virtutes in finitima vitia de-  
torquet? Ut cum animi altitudo ho-  
minum nostrorum atque virtus, quæ  
in periculis contemnendis lucere so-  
let, feritati tribuitur. Quod si quis  
Germanorum, quibus ingenia Eu-  
gubinus adimit, vellet in hoc genere  
ingeniosus esse, nonne quæ multo vel  
præstantissima sunt, ea ad speciem  
turpem facile orationis vi convertere  
posset? Nulla enim virtus est, cui  
non vitium aliquod sit finicimum.

Quo



Quo facilius id quod honestum est atque bonum, dicēdo, eo potest traduci, ut malum esse videatur. Recte igitur tu, qui prudentiam Eugubini requiris: cum præsertim multi sint nostrorum hominum, si commoveant sese, sentiat ille, Germanis neque ingenia, neque facultatem orationis, neque maximarum rerum scientiam deesse. Quamquam res ipsa pro hominibus nostris loquitur, etiamsi nullum faciant verbum: quod multa iam extant signa, eaque illustria, non solum ingenii illorum, sed etiam eximiæ doctrinæ. Adde, quod ipsum Eugubini institutum, ei acerbiter istam exprobrare videtur. Quid enim ab officio hominis Christiani, sacerdotis, & theologi, alienius esse potest, quam in eo quo se profitetur religionem defendere, tantum acerbiter effundere; & contra quam lex mutui amoris sancit, multos bonos viros de se nihil tale merentes tam insigni iniuria afficere? Sed de his Eugubinus ipse viderit:

viderit: ego, quod ad me attinet, mallem, illum isto maledicendi genere supersedisſe. Faveo enim hominis honori. Quod ſi feciſſet, maiorem proculdubio fructum indiſtriæ ſuæ cepiſſet, nec eam, ad quam ſe excitavit bene audiendi rationem, ipſe in dubium vocaſſet. De Guilhelmo Budæo quæ ſcripſiſti, ea me ſingulari affecerunt voluptate. Ille enim ita ſe gerit, & ea nobis affert, ut mihi videatur natus eſſe ad lucem rectis ſtudiis inferendam. Lætor igitur, virum illum in eo etiam nunc curſu eſſe, quem iamdudum magna ſua cum gloria tenet. Hic ſi tantum apud ſuos autoritate valet, quantum excellens eius doctrina & virtus, quæ uno omnium ore celebratur, poſtulat, & gaudendum eſt certe omnibus bonis, & præclare cum Galliis ipſis agitur. Hæc fere ad epistolam tuam. Iam vero ne te fugiat quo loci ſint reſ noſtræ, ſic habeto, religionem aliquanto perturbatiorem eſſe, quam fuit antehac. Et ortus eſt nuper neſcio

scio quis terræ filius, qui conatur novum malum invehere. Negat enim, necessaria esse ad Eucharistiam verba Christi, quibus ea consecratur: quin nec speciem panis aut vini necessariam esse, sed satis esse, si motu interiori cordis Eucharistia capiatur. Ita cum hic ad spiritalem manducationem referat omnia, id agit ut possit argumentum ipsum funditus tollere. Sed deus tamen pro sua misericordia nos respexit, cuius divino beneficio effectum est, ut authore in vincula coniecto, hæc hæresis oppressa sit antea, quam in vulgus proferretur. Novi præterea, quod scribam, nihil sane est, & arbitror satis multa esse hæc, præsertim ad te virum nunquam satis vacuum. Sed malui tamen multus esse, quam non declarare, me iis quæ scripsisti, valde delectari: de quibus certe tecum quasi loquens quanta voluptate perfusus sim, inde perspicias facile, quod finē dicendi ægre fecerim. Non igitur mihi visus es garrere, (qua tu voce  
uteris.

AD ERAS. ROTEROD. 165  
uteris ) sed aptissime gravissimeque  
loqui, & tanto me vehementius a-  
mare, quanto longiores fuerunt hæ  
literæ tuæ. Quare tam me tibi be-  
neficio adstrictum sentio, quam  
quem maxime: cumque mihi nihil  
esse possit antiquius, quam ut grati-  
tudinem meam erga te quibuscun-  
que possim rebus testificer, magnum  
mihi beneficium dederis, si ostende-  
ris, in quare officium meum tibi præ-  
stari velis. Vale. Litii III Non. Maii,  
Anno M. D. XXXIII.

DES. ERASMUS  
ROTTERODAMUS

Clariss.

*L.L. Doctori*

IOANNI RINCO

S. D.

**L**iteræ tuæ, vir ornatissime, qui-  
bus & pro tua prudentia sagaci-  
ter divinas imminentes Germaniæ  
cala-

calamitates, & eas pie deprecaris, permoverunt animum meum, ut ad omnipotentem illum pacificatorem, & ut Paulus vocat, *μειλικω*, precationem conscriberem, qua simul omnes dominum, iratum quidem, ut videtur, sed exorabilem, appellemus. De non movenda Camarina, amanter tu quidem ac fideliter, sed sero, mones. Et merebatur hoc quorundam scurrilis improbitas; nec deerant amici qui per literas huc hortarentur. Bene vale, amicorum candidissime. Friburgi, v die Martii, Anno à Christo nato M D XXXII.

## P R E C A T I O

Ad Dominum Iesum

PRO PACE ECCLESIAE.

**D**omine Iesu Christe, qui pro tua omnipotentia condidisti creaturam omnem, visibilem pariter & invisibilem, pro tua divina sapientia ordine pulcherrimo gubernas ac digeris

digeris universa , pro tua ineffabili bonitate servas , tueris , ac vegetas omnia , pro tua immensa misericordia restituis luxata , reformas collapſa , mortua revivificas: dignare quęsumus tandem ad unice dilectam tibi sponsam Ecclesiam flectere vultum tuum , sed illum placidum ac propitium, quo serenas omnia quę in cœlis, quę in terris , quę supra cœlos infraque terras sunt: flectere digneris oculos illos mites ac misericordes , quibus Petrum ecclesię tuę summum pastorem intuitus es , ac mox resipuit , quibus turbam palantem aspexisti , & misericordia commotus es , quod ob inopiam pastoris errarēt, velut oves dissipatę disiectęq;. Vides, pastor bone, quam varia luporum genera irruperint in caulas tuas, quorum quisque clamat, hic est Christus , hic est Christus: ut in errorem pertrahantur, si fieri possit , etiam perfecti. Vides , quibus ventis , quibus undis , quibus procellis iactetur tua navicula , extra quam

quam nulli vis esse salutem. Quid superest, nisi ut illa demersa fluctibus, pereamus omnes? Hanc tempestatem accersiverunt nobis scelera nostra: agnoscimus & confitemur. Agnoscimus tuam iustitiam, & nostram iniustitiam deploramus, sed appellamus tuam misericordiã, quę, iuxta propheticum Psalmum, superat omnia opera tua. Multum iam pœnarum dedimus, tot bellis attriti, tot exactionibus exhausti, tot morborum ac pestilentiarum generibus afflicti, tot inundationibus concussi, tot portentis è cœlo minantibus territi: nec inter hæc mala subinde nova lassescentibus, ullus undecunque portus apparet, sed atrociora videntur impendere. Non querimus de severitate tua, mitissime servator, sed agnoscimus hic quoque tuam misericordiam, longe siquidem atrociora merueramus. Verum noli, clementissime Iesu, perpendere quid nostris meritis debeat, sed quid tuam deceat misericordiam, sine qua

qua nec angeli possent subsistere, nedum nos lutea vascula. Misere nostri, redemptor exorabilis, non quod ipsi simus digni, sed hanc sancto nomini tuo da gloriam. Ne permittas, ut Iudæi, Turcæ ac cæteri, qui vel non noverunt te, vel invident tuæ gloriæ, perpetuo glorientur de nobis, dicantque, Ubi est deus eorum? ubi redemptor? ubi servator? ubi sponsus, quem iactant? Hæc opprobria in te recidunt, dum ex nostris malis æstima- tur tua bonitas. Desertos credunt, quos non intelligunt emendari. Olim quum in navi dormires, & exorta tempestas minaretur omnibus exitium, ad inclamationem paucorum discipulorum expectatus es, & mox ad vocem tuam omnipotentem, subsederè fluctus, consiluerè venti, tumultus subito versus est in tranquillitatem magnam. Agno- verunt elementa muta conditoris imperium. Nunc in hac longe gra- viore tempestate, qua periclitantur

H

non



non paucorum corpora, sed innumerabiles animæ, ad totius Ecclesiæ tuæ periclitantis clamorem rogamus ut expergiscare. Tot hominum milia clamant, Domine serva nos, perimus. Tempestas vicit humanam industriam: imo videmus, opitulari volentium conatus in diversum cedere. Tua voce opus est, domine Iesu. Tantum dic verbo, Consileſce, tempestas; & protinus illucescet optata tranquillitas. Parsurus eras tot sceleratissimorum hominum milibus si in Sodomis reperti fuissent decem iusti. Nunc tot sunt hominum millia, qui diligunt nominis tui gloriam, qui suspirant decorem domus tuæ: an non ad horum preces, iram tuam remittes, ac veterum misericordiarum tuarum recordaberis? Non cœlesti tuo artificio nostram stulticiam vertes in tuam gloriam? Non improborum mala vertes in Ecclesiæ tuæ bonum? Solet enim tua misericordia tum maxime adesse, quum

quum rebus maxime deploratis, hominum nec vires nec prudentia possunt opitulari. Tu solus res quamlibet discordes redigis in concordiam, unicus pacis & autor & tutor. Tu Chaos illud vetus, in quo nullo ordine nulloque decore confusa iacebant discordia rerum semina, digessimisti admirabili ordine: quæ natura pugnant, æterno fœdere sociasti. At quanto turpius est chaos, ubi nulla est charitas, nulla fides, nulla fœdera, nulla legum, nulla præpositorum reverentia, nullus dogmatum consensus, sed velut in dissono choro suam quisque canit cantionem? Inter cœlestes orbes nullum est dissidium, elementa suum quæque locum servant, suis quæque funguntur muneribus. Et sponsam tuam, in cuius gratiam condita sunt universa, fines perpetuis dissidiis ire pessum? Patieris ut impii spiritus discordiarum autores, in tuo regno tyrannidem exerceant impune? Patieris illum fortem,

H. 2 . . . . . quem

quem semel expugnatum deturbasti, rursus occupare tua castra? Quum mortalis inter homines versaberis homo, ad tuam vocem affugiebant dæmonia. Emitte quæsumus domine spiritum tuum, qui dispellat à pectoribus omnium, tuum adorabile nomen profitentium, spiritus impios, luxus, avaritiæ, ambitionis, libidinis, vindictæ, discordiæque magistros: & ut prophetis verbis utamur, Cor mundum deus & rex noster crea in nobis, & spiritum sanctum innova in visceribus nostris, spiritum sanctum tuum ne auferas à nobis. Redde nobis læticiam salutaris tui, & spiritu principali confirma sponsam tuam, ac sponsæ tuæ pastores. Per hunc spiritum terrena cœlestibus conciliaisti, per hunc tot linguas, tot nationes, tot hominum tam varias formas in unum ecclesiæ corpus compegisti, quod tibi capiti suo per eundem spiritum cohæret. Eum si dignaberis in omnium cordibus innova-

innovare, cessabunt & illæ calamitates externæ, aut si minus cessabunt, certe te diligentibus cedent in lucrū pietatis. Digere hoc chaos, domine Iesu, expandat se spiritus tuus super has aquas male fluctuantium dogmatum. Et quoniam spiritus tuus qui iuxta prophetæ sermonem continet omnia, scientiam habet etiam vocis, fac ut quemadmodum cunctis in tua domo versantibus, una lux est, unum baptisma, unus deus, una spes, unus spiritus, ita sit & vox una catholicam veritatem profitentium. Ascendens in cælum, triumphantium more, sparsisti ex alto preciosa missilia, dedisti dona in hominibus, dilargitus es varia spiritus tui munera. Rursum ex alto renova veterem munificentiam tuam, da ecclesiæ tuæ labascenti, quod dedisti nascenti. Da principibus timorem tui, ut sic Remp. administrent, tanquam brevi tibi regum regi rationem de singulis reddituri: da throno tuo sem-

per assistentem sapientiam , ut quid sit optimum factu perspiciant animo , factisque persequantur. Da pastoribus , quibus tuas vices delegare dignatus es, prophetiæ donum, ut arcanas scripturas , non ex humano sensu , sed ex tuo afflatu interpretentur. Da charitatem triplicem , quam à Petro stipulatus es, ovium curam illi demandaturus. Da sacerdotibus tuis sobrietatis & castitatis amorem. Da populo tuo bonam voluntatem obtemperandi præceptis tuis , ac promptitudinem obsequendi iis per quos iuxta tuum animum voluisti res humanas administrari. Ita fiet, ut si principes, tuo munere , te digna imperent , si pastores te digna doceant, populus bene imperantibus ac pia docentibus obtemperet , ecclesiæ simul cum ordine redeat pristina tum dignitas , tum tranquillitas, ad tui nominis gloriam. Ninivitis internecioni destinatis , simul ut ad pœnitentiam conversi sunt , pepercisti : & spon-

sponsam tuam pedibus tuis advolutam aspernaberis? Quæ pro sacco habet suspiria, pro cinere lachrymas. Pollicitus es veniam ad te conversis: sed ipsum tui muneris est, ut quis ad te toto pectore convertatur, ut omnia bona nostra redundent in tuam gloriam. Conditor es, instaura plasma tuum. Redemptor es, serva mercem tuam. Servator es, ne sinas eos interire qui toti pendent ex te. Dominus es, asserere possessionem tuam. Caput es, subveni membris tuis. Rex es, da legum tuarum reverentiam. Princeps es pacis, inspira nobis charitatem mutuam. Deus es, miserere supplicum. Esto, iuxta Pauli dictum, omnia in omnibus, ut universus ecclesiæ tuæ chorus, concordibus animis, & consonantibus vocibus, pro impetrata misericordia gratias agat patri & filio & spiritui sancto; qui ad absolutum concordia exemplum, personarum proprietate

176 P R E C. P R O P A C E E C C L E S.  
distincti estis, natura unum ; qui-  
bus laus & gloria in æternum,  
A M E N.

F. I N I S.











